

WAPI MUTINDU MU LENDA KUNUNGA?



Beto kulumusa bayintu ya beto samu na kisambu.

Tata ya beto, beto ke tonda Nge, na suka yayi, samu na ntangu yayi ya nene ya kuvukana dyaka, mpe kuzibula Ndinga ya Mfumu, kutula Yawu awa na ntwala ya beto. Mpe—mpe na kisambu ntangu yayi, ti Mpeve-Santu ke baka yina kele Nzambi, mpe ke pesa Yawu na beto, ti beto lendaka bika kisika yayi ya lusambulu bubu yayi na nsayi na bantima ya kufuluka na kyese. Kumona ngolo ya Nge ya nene ya luvukulu, Mfumu, mutindu ya ke vulusa bampika mpe ke pesa bawu kimpwanza, ke sala beto kuzaba “bima yina vwandaka, mpe yina kele, mpe yina ke kwiza.” Mpe beto ke tonda kaka Nge samu na bima yayi.

² Beto ke sambila ti Nge ke sakumuna beto na yina beto ke longuka Ndinga ya Nge ntangu yayi kintwadi. Mpe na ntangu beto ke kwenda, bika ti ya tubama na kati ya bantima ya beto, na ntangu beto ke kwenda na nzila, “Bantima ya beto vwandaka pela na kati ya beto na yina Yandi, Mpeve-Santu, vwandaka zonza na beto na yina beto vwandaka na nzila.”

³ Sakumuna konso mulongi bubu yayi, bisika nionso, bisadi ya Nge yina me telema samu na Yayi, na Kieleka ya Nge. Pesa mvutu na bisambu ya bawu ya bambevo. Belusa banzutu ya bambevo yina ke na mpasi.

⁴ Mfumu, beto ke lomba ti Nge ke kwenda na kati-kati ya bantu mpe kusosa nkuna yina solamaka ntete kuna, Mfumu, mpe kunata yandi, na mutindu mosi, ti Nsemo ke kubwa na nzila ya yandi, Mfumu. Samu, beto ke kwikila ti ngunga ke na kukuma ntama, mwini ke na kukulumuka na nswalu na wesete, mpe ntama ve “ntangu ke vwanda dyaka ve.” Ntangu mpe Seko ke vukana kintwadi ntangu Nzambi mpe bantu ya Yandi ke vukana kintwadi. Mpe beto ke sambila, Nzambi, ti, na ntangu yina, ti beto ke tangama na kati-kati ya bayina ke vukana na Klisto, bayina ba ke bokila Kento ya Yandi ya makwela.

Sadisa beto, bubu yayi, na yina beto ke na kukubama, na kuzabaka ve yina mbasi ke simba, kasi beto kele ya kukubama na kuzwa nionso, Mfumu, landila yina beto me zaba, yina Nge kele na yawu samu na beto. Beto me kubama na kuzwa yawu. Beto ke lomba lusakumunu yayi samu na nkembo ya Nzambi, na Nkumbu ya Yesu Klisto. Amen.

Beno lenda vwanda.

⁵ Kieleka mu vwandaka na kyese, na suka yayi, ntangu mu kotaka mpe monaka ti bantu vukanaka kisika mosi samu na kisalu ya Mfumu. Mpe beto ke na kupesa nsamunu ntangu yayi samu na nkokila yayi. Ya ke vwanda na lukutakanu ya kubeluka na nkokila yayi. Beto ke sambila samu na bambevo, na nkokila yayi. Kaka na mwa ntangu fioti me luta, bawu . . .

⁶ Na yina mu me kota, Billy, mwana ya munu ya bakala, vwanda me tuba na munu, yandi tubaka, “Ya kele na bakala awa, yina kele kaka muntu ya mawa yina me katuka ntama na ditoma.” Mpe yandi tubaka, “Mu—mu me tula yandi na kivinga, Papa.”

⁷ Mu—mu kumaka lutale nkokila yina me luta, mpe—mpe kuzwaka ntangu mingi ve ya kutanga na zulu ya dilongi ya lukolo ya Lumingu yina mu zolaka zonzila, na suka yayi. Na yawu mu bakaka mwa banoti fyoti yina mu bakaka na yina mu kuwaka mpangi mosi ya bakala kutubaka, mpe bakaka na yawu dilongi, samu na mwa kuzwa dilongi ya lukolo ya Lumingu na suka yayi; mpe na yina beto ke kubama, mpe ke yilama samu na lukutakanu ya nkokila.

⁸ Mpe Billy tubaka, “Ya kele na muntu kuna yina kele ya kubela.” Yandi tubaka, “Mu—mu—mu zola ti nge kwenda mona yandi.” Na yawu, mu vwanda me kwenda na kivinga kaka ntangu yayi. Mpe mpangi ya bakala ya pene bamvula ya munu, mpe kento ya yandi, vwandaka ya kuvwanda kuna. Mpe Mpeve-Santu me kulumuka na kati ya beto na kati ya kivinga kaka ntangu yayi.

⁹ Beno banza kaka, kutuba kaka na lukutakanu ya kubeluka, mpe kuna Yandi vwandaka. Beno me mona? Mpe Yandi tubaka na mpangi ya bakala yayi nionso yina yandi salaka, mpe yina yandi vwandaka sala, mpe yina nataka mpasi ya yandi, mpe kisika yandi me katuka, mpe nionso yina me tadila yandi. Mpe ya vwandaka na kivudi mosi ya nene ya ndombe na zulu ya kivinga. Na yina ya bandaka kulezima mingi, mingi, mingi, mpe mingi, mpe Mpeve-Santu bakaka ntwadusulu.

¹⁰ Ntangu yayi, mu banza ti bakala yango kele . . . kisika mosi na manima awa ntangu yayi. Yandi na kento ya yandi mu banza lenda kota ve na kivinga, kasi ba tubaka ti ba ke vwanda, na mutindu nionso, samu na lukutakanu. Ba me katuka kuna, pene ya Yakima, na Washington, mpe me kwiza na ditoma. Mpe yandi kele mulongi ya Nsangu ya mbote.

Kasi kumona kaka lemvo ya—ya Nzambi kuna! Kisika, bakala yango vwandaka na yinzo ya bambevo mpe kuzwaka bankisi mpe nionso. Mpeve-Santu vwandaka me monisa nionso yayi. Na yina, badokotolo mekaka na kusala nionso yina bawu lendaka na kusala, mu banza, samu na muntu yayi, kasi ya lombaka kaka mwa kusimba mosi ya Nzambi, samu na kubalula dyambu. Bankisi ya kuningisa na kulan kele nionso mbote, kasi

ya kele mutindu beto ke zonzaka “kukubula ya mpamba,” beno zaba. Beno, ya lendaka belisa beno kulutila, beno me mona, samu ti beno ke zimbana nionso yina beno zabaka, ntangu ba ke tula nkisi yina na beno. Kasi Mfumu Nzambi, mutindu kele lemvo ya Yandi mpe mawa! Mpe kaka ntete mu tuba dyambu mosi na kisambu samu na yandi, ya yilamaka yimeni. Beno me mona? Ya lombaka kaka kima mosi yina ya Nzambi, kusimba mosi yina, samu na kusala yawu.

Mu zolaka tuba yayi ve. Yinga. Mu me tala kuna, mu me mona bakala yango awa. Mbote, mu zabaka ve kana beno ke vwanda awa bubu yayi, to ve.

¹¹ Kuna na kizunga kisika mu vwandaka, sabala yayi. Mu—mu—mu zola bankundi ya munu kuna. Ya kele mwa konze na ntwala ya balukutakanu ya nene yayi, beno me mona. Mpe mu me kwiza na yinzo, samu na kukwenda kuna na kuzomba bampadi na bampangi yayi. Mpe dibuta yayi, mabuta, na kisika, na bayina mu ke vwandaka kuna, kele ya kieleka bantu ya luzolo. Mpe bakala, mpangi ya kieleka ya bakala, bankundi; bawu kele.

Mpe mosi ya bawu kele muntu ke zolaka mingi kuzomba ya—ya bayimbwa. Mpe yandi kele na lupangu ya kufuluka na yawu kuna. Mpe—mpe mu monaka yimbwa ya fioti ya kitoko mingi kuna, kibulu mosi ya fioti, yina mu ke bokilaka mutindu, “ndambu ya yimbwa ya zulu mpe bayimbwa zole ya yinda,” beno zaba, yina—yina vwandaka kima bisika nionso na yinzo kuna. Mpe mu banzaka, “Oh, ya kele kima ya mutindu yina ti Joe ke zola kuzwa!”

¹² Mpe, ya kieleka, kuna na Arizona, yandi ke vwanda na mfunu ve. Yandi ke kota na cactus, mpe yina ke vwanda nsuka ya yandi. Na yawu kuna mu tubaka, mpe, “Beto lenda kuzwa yawu ve. Kuna ba ke sadilaka bayimbwa ve, na kizunga yina ya yinsi. Samu, bawu, mbote, ba lenda kaka ve kusadila bawu. Ba ke. . . mpe, klima, mutindu ya yinsi na ba-cactus, mpe ya ke kufwa bawu.” Mpe dyaka, ya kieleka, yimbwa kuna, kibulu, to kima mosi ke kufwa yandi, mu banza, na mutindu nionso, kana yandi basika kuna.

¹³ Na yawu kuna muntu yayi tubaka na munu, “Nge lenda kaka kuzwa yawu.” Kasi mu—mu lendaka ve kubaka yawu. Mu—mu sepelaka na yawu. Mu bakulaka ti, ya vwandaka mosi ya bayibwa ya yandi ya luzolo.

¹⁴ Mpe bakala yayi kele na mwa kento mosi ya luzolo mpe bana ya fioti. Mpe kilumbu yankaka yina, kento bandaka na kuvutuka na ditoma ya bakala, mpe yandi vwandaka na ditoma yayi Oldsmobile. Mpe mwa yimbwa yina vwandaka yinda kaka mutindu *yayi*, kaka yimbwa ya fioti. Mpe yandi diataka kaka ya yawu. Oldsmobile yina lutaka kaka na zulu ya mwa yimbwa yina, *awa* na mukongo ya yawu, mpe diataka yawu, kisika matadi na nzila ya yinzo tobolaka kivumu ya yandi

ya fioti awa, beno zaba. Mpe—mpe mwa kento yina, na kisika ya kunata na nswalu mwa yimbwa yina na veterinaire. . . Ya kieleka, veterinaire zolaka lalisa kaka yawu kuna, mpe kufwa yawu. Beno me mona?

Ya vwandaka na ntwenya yankaka ya bakala na munu. Mpe kaka na ntangu yandi belamaka kuna, yandi tubaka, “Kana ya vwandaka yimbwa ya munu, mu zolaka kubula yawu.” Yandi tubaka, “Kaka yina. Kubika yawu kutala mpasi mutindu yina?”

¹⁵ Mu tubaka, “Mbote, ti beto kubula yawu ve.” Mu tubaka, “Beto vingila mwa fioti.”

Mu kwendisaka bantu nyonso, mpe kwendaka mpe sambilaka samu na yawu. Mwa yimbwa yina landaka munu tii na vlanda. Mpe yandi, yinga, yandi. . . Beno me mona? “Bima nyonso yina beno ke zola, ntangu beno ke sambila, beno kwikila ti beno ke kuzwa yawu; beno ke kuzwa yawu, ya ke pesama na beno.” “Bima nyonso.” Ya kele Mfumu ya beto Nzambi, mutindu yina ve? Yandi kele—Yandi kele ya kuyituka mpe ya mbote. Mpe ya kieleka beto ke zolaka Yandi, na suka yayi; mpe ke vingila Yandi, mpe na kuzabaka. . .

¹⁶ Mu monaka, kilumbu yankaka yina, bankwelani ya biboba, mama mpe tata ya mambele mosi ya mbote mingi ya dibuundu yayi—yayi ya bakwikidi. Mpe mama kele, oh, mu banza ti yandi me kuma na bamvula pene-pene ya nkama mosi, mpe papa, mpe. Mpe na kutala bamvula kumi na zole muntu yayi me balukaka ntete ve; na mukongo ya yandi, kaka ya kulala. To, lenda lala ve na lweka ya yandi, to kima ve. Ya kulala kuna bamvula kumi na zole. Kaka buboba. Mpe mama na kutala na ntangu yayi me kuma na bamvula ya yandi, mu banza, kisika mosi kuna pene-pene ya nkama mosi, mpe kiboba ya mawa ya kento yina na kutala me zimbisa kaka mabanza ya yandi. Yandi ke na kubanzaka ti muntu ke na kubakaka nionso kele ya yandi.

Mpe mu talaka na. . . na ziunga ya mesa, na beto nionso, bantwenya mpe biboba, ya kuvwanda kuna. Mpe mu tubaka, “Wapi sika beto ke na kwenda? Yinki beto ke na kusala?” Mpe mama na yina mu vwandaka zinga kuna, yina vwandaka mama mpe papa ya yandi. Mpe mu tubaka, “Beni ke na kwenda na nzila yina, mpe. Ya kieleka, beto nionso.” Beno me mona?

¹⁷ Beno banza kaka na yawu, kaka mwa ntangu fyoti, ntete beto banda leso ya beto. Ya kele kisika beno ke na kwenda. Samu na yinki beno ke na kukikwamisa? Samu beno zinga. Samu na yinki beno ke zinga? Samu beno kufwa. Ya ke vwanda ve bulawu kana beto ndima ve yina Nzambi kubikaka samu na Luzingu ya Seko? Yinki beto lena banza na yawu? Yinki—yinki lenda vwanda na mabanza na beto, yina lenda benda atensyo ya beto na. . . na nionso? Yinki kana beno kele na nkama ya mafuku ya ba-dollar, mpe beno kele mfumu ya etat ya—ya Indiana, to ya etat nionso yankaka, to mpe yinsi, to, na kutala, yinza ya muvimba?

Kana beno zinga mingi, beno fwana lutila na yawu, mpe. Beno me mona? Mpe ntangu nionso, kilumbu na manima ya kilumbu, konso ntangu ntima ya beno ke bula, beno ke kwenda mbala mosi na yawu. Beno me mona? Beno, ya kele na siansi ve ti beno nunga. Beno kele na lweka ya bayina ke kondwa, mpe, beno, beno fwana kondwa. Kasi beno bambuka moyo na nsilulu, ti, “Yandi yina ke zimbisa luzingu ya yandi samu na luzolo ya Munu ke kuzwa yawu.” Ntangu yayi, yinki ke vwanda ya kulutila kimvwama na kuzwa Luzingu, ata ti beno kuzwa yinza ya muvimba ya beno mosi? Kasi, kana beno—kana beno kuzwa Luzingu, beno me kuzwa kima ya kulutula nene yina ba lendaka kuzwa. Mu zola . . .

¹⁸ Na kutalaka na diboko ya munu ya kikento mu ke mona dyaka, keni yankaka ya lemvo ya Mfumu. Pene ya basabala fioti me luta, ba bokilaka munu na alo-alo. Mpe mambele mosi ya luzolo ya dibuundu yayi, to ya nzutu yayi . . . Mu ke zolaka mingi ve kubokila yayi dibuundu. Mu—mu ke zolaka kubokila yayi, yina . . .

Mutindu mu vwandaka zonga na bantu mosi, bawu tubaka, “Mbote, nge kele ya wapi dibuundu?”

Mu tubaka, “Mu kele ve . . .”

“Nge kele ya wapi denominasyo?”

Mu tubaka, “Ya ata mosi.”

Bawu tubaka, “Mbote, nge kele ya wapi yina?”

Mu tubaka, “Ya Kimfumu.”

¹⁹ Ya Kimfumu! “Mpe na Mpeve mosi beto me botama na Kimfumu yina.” Na Mpeve mosi, beto nionso, me kota na Kimfumu yayi! Yesu tubaka, “Beno sambila, “Ti Kimfumu ya Nge kukwiza. Luzolo ya Nge kusalama na ntoto, mutindu ya kele na Mazulu.” Ntangu yayi, Yandi telemaka kilumbu mosi na ntuala ya Mongo ya Nsobolo, Yandi tubaka, “Ya kieleka Mu ke tuba na beno, ti bayankaka me telama awa, ke meka ve lufwa, tii ba ke mona Kimfumu kukota na ngolo.” Ya vwandaka lakisaka na ntuala, mutindu beto zonzilaka yawu, na Mongo ya Nsobolo. Mpe Biblia ke tuba, “Kimfumu ya Nzambi kele na kati ya beno.” Na yawu, yayi kele Kimfumu ya bantu ke tubaka ti yayi kele yinzo ya bawu ve. Yayi kele yinzo ya beto ve. Beto ke na kuingila na Nkwizulu ya Ntinu, na kuvwandisa Kimfumu.

²⁰ Ba bokilaka munu na dyambu ya nswalu-nswalu, ya mpangi ya bakala ya kiboba yina vwandaka mutindu papa samu na munu. Mpe yandi . . . Mu zabaka yandi ntama mingi ve, kasi mu ke bambuka moyo na kilumbu yina mu nataka yandi awa na kubotika yandi na maza. Mpe bakala yayi ntama mingi ve ke vwanda na bamvula makumi yivwa na mosi. Mpe kento ya yandi ya luzolo kubokilaka munu, mpe yandi vwandaka infirmière, yandi tubaka, “Yandi me kuzwa mbwisulu ya ntima

nyonso.” Mpe dyaka, yandi vwandaka . . . Oh, mu ke bokila . . . mu lenda ve kutanguna nkumbu. Ntima kukangamaka. [Mpangi mosi ya kento me tuba, “Kulwala ya ntima.”—Mu.] Kulwala mpe kukangama ya ntima. Matondo. Kulwala mpe kukangama ya ntima, mpe mbwisulu ya muvimba ya ntima. Dokotolo vwanda pesa ata kivuvu, ya fioti ve. Mpe bakala yina vwanda kufwa, mpe yandi bokilaka munu.

²¹ Mpe mu kotaka na mwa Ford ya munu ya ntama, mpe bakaka nzila ya Ohio, na mutindu mu lendaka, mpe mu zabaka ve, ti mosi ya bisengo ya bapine ya munu vwandaka ya kutengama, ya vwanda bebisa pine. Mpe na yawu kuna, mu vwanda kwenda kuna, mu vwanda basika na station, na ngunga pene kumi na mosi, mu vwanda kukikwamisa samu na yandi, mu—mu zola yandi. Mpe mu zaba, kana—kana ya landila, kana Mfumu kukwiza ve, na yina, ntama mingi ve, beto ke kabuka mosi na yankaka.

²² Kasi, yina ke sonisa ve Enlevement, ntangu yayi. Beno me mona? Ve. Ba ke kwiza ntete, kuna. Ba kele na bweso, bayina kwendaka ntama. Ba ke kwiza ntete. Beno me mona? Beno me mona? “Beto bayina kele moyo mpe ke bikana, samu na Nkwizulu ya Mfumu, beto ke vwanda ve na mantwala to ke kanga nzila na bayina kele ya kulala. Mpungi ya Nzambi ke bula; bayina kufwaka kati na Klisto ke vumbuka ntete. Na yina ntangu meso ya beto ke mona baya beto ya luzolo, na yina beto ke soba, na ntangu fioti, na mbwetolo ya meso, mpe na bawu ba ke zangula beto kintwadi.” Beno me mona? Bayina ke kwenda ntete kele na bweso na zulu ya bayina ke na kuzinga.

²³ Na yina mu basikaka na station, kaka na ngunga ya kumi na mosi, Mpeve-Santu tubaka na munu, “Kukikwamiza samu na yandi ve. Nge ke pesana dyaka diboko na yandi, na bala-bala, mpe yandi ke kwiza na dibuundu,” muntu ya bamvula makumi yivwa na mosi, yina ke na kufwa.

Ntangu mu kutanaka na kento ya yandi mpe baya yandi ya luzolo na lupitalu na Lima, ba tubilaka munu mutindu yandi vwandaka. Mu kotaka, mu talaka yandi kuna. Ba tubaka, “Kasi ya kele na kima ya ngitukulu.” Ba tubaka, “Yandi—yandi bandaka na kukuma mbote, na ngunga ya kumi na mosi.” Mbote, mpe mu ke . . . Mfumu talisaka bima mingi na bantu yina, ba zabaka ti mu tubaka kaka yawu ve. Samu ti, na munu ntete bawu tubaka yawu, “Yandi bandaka na kusoba.” Ba zabaka ti mu ke tubila bawu kieleka.

²⁴ Na yina, Lumingu me luta, na yina mu vwandaka kwenda na Cafétéria Blue Boar na Louisville, kisika mu banza pene ya makumi nana na zulu ya nkama ya dibuundu yayi ke vukanaka na Lumingu na manima ya midi, samu na kudya, nani mu monaka ke kulumuka bala-bala? Mu ke tuba na beno, ntima ya munu kutekitaka ntangu mu monaka Mpangi ya beto Dauch

kukulumuka na bala-bala, kaka yina Yandi tubaka na munu. Mu pesaka yandi mbote, na—na bala-bala.

²⁵ Mpe mu—mu vutukaka awa samu na Lumingu na nkokila me luta mpe mu zonzilaka na dilongi ya kuvukisa, na *Kuvukisa Kidimbu Ya Ntangu*. Na yawu. . . Mpe kuna yina nataka yawu na kusalama, kaka yina Yandi tubaka. Mpe awa yandi kele ya kuvwanda na dibuundu bubu yayi, kaka awa na lweka ya beto, mutindu keni ya lemvo ya Nzambi. Ntangu mu pesaka yandi diboko na yisi ya tenta, ya tenta ya oxygène na yisi ya yina yandi vwandaka, mu tubaka, “Mpangi Dauch, nge ke vwanda mbote. Mu ke mona dyaka nge na dibuundu. Ti, ya kele MUTINDU ME TUBA MFUMU.” Beno me mona? Awa yandi kele ya kuvwanda na dibuundu, kaka awa ntangu yayi, Mpangi Dauch.

²⁶ Kana mu me zimbana ve, mulongi yina mu vwandaka zonzila, mwa ntangu fioti me luta, Mpeve-Santu kwizaka mpe talisaka bima yayi nionso; tubaka na yandi mutindu yawu salamaka, mpe tubaka na yandi yina yandi salaka; mutindu ya salamaka, mutindu ya kwizaka na kusalama, nionso yina salamaka kubanda kuna, mpe na nkadulu ya dibuta ya yandi, mpe nionso yina. Mpe tubaka na yandi, ti, “Ya me suka.” Mpe mulongi kele kaka ya kuvwanda awa, na diboko ya munu ya kibakala. Nge zola kaka kutelemisa diboko ya nge, tata? Kuna, yandi na kento ya yandi, kieleka, kaka ntangu yayi.

Awa kele ya kuvwanda Mpangi Dauch, kaka awa ntangu yayi. Oh, la la!

²⁷ Yandi kele ve mbote? “Bima yina vwandaka, yina kele, mpe ke salama.” Bambangi mosi, zole, tatu. “Bima yina vwandaka, yina beno salaka; bima yina ke salama ntangu yayi; mpe bima yina ke salama.” Mpe ntangu nionso, ya kieleka, ya kieleka na zulu ya Ndinga. Ya kele kaka Nzambi lenda sala yawu. Oh! Beto kele ve na kyese mingi samu na bima yayi?

²⁸ Ntangu yayi, kikuma kaka mu vwandaka baka mwa ntangu fioti diaka, vwandaka Billy zolaka kwenda kuzwa kento na bébé ya yandi. Mpe yandi tubaka, “Papa, kubanda kulonga ve tii kuna mu ke vutuka.” Na yawu, mu—mu banza ti yandi me vutuka ntangu yayi. Mpe mu zolaka kuzwa ntangu yina, na mutindu nyonso. Mpe mu ke na kumeka na kubika bangunga yiya yayi ya kulembisa na yisi ya yina mu tulaka beno nyonso awa, mpe kusala yawu baminuti makumi tatu na tanu, to makumi yiya, beno me mona, mpe kumeka na kuzitisa yawu.

²⁹ Ntangu yayi, ba salaka munu mulabu kilumbu mosi na Chicago. Mu bakaka baminuti makumi tatu, to kima, baminuti makumi tatu na tanu. Mpe nkokila ya Lumingu me luta mu bakaka kaka baminuti makumi yiya na tanu. Billy tubaka, “Nge ke na kusalaka mangolo, papa. Mu kele na kiesa mingi na nge, na yawu.”

³⁰ Mbote, mu banza, na suka yayi, na kubakaka yawu mutindu leso ya lukolo ya Lumingu, mu ke baka beno ntangu ya yinda ve. Na yina beno lenda basika mpe kuzwa madya ya beno, mpe kusambila, mpe kuvutuka na nkokila yayi samu na balukutakanu ya kubeluka ya nzutu. Beto ke sala ndonga ya bisambu na nkokila yayi mpe beto ke sambila samu na bambevo.

³¹ Ntangu yayi, kana beno zaba bantu yina ke vwandaka na kizunga, bisika nionso, bayina kele ya kubela mpe zola ti ba sambila samu na bawu, beno nata bawu awa na nkokila yayi. Beno me mona? Kana beno fwana kunata bawu, na mutindu nionso, beno nata bawu awa. Beno me mona? Yina kele kima ya ngundi, ya kele, kunata bawu awa na nkokila yayi. Beto nyonso ke vukana kintwadi. Mutindu yina . . . Ya kele mpasi na kusala lubokilu, na kukwendaka kisika na manima ya kisika; kuna kana beno kondwa muntu, mpe ya ke nyongisa mingi. Kasi kana mu lenda kuzwa bawu nyonso na kisika mosi, kuna mu lenda sambila samu na bawu. Ntangu yayi, kana beno ke . . . Kana bantu zola ti ba sambila bawu, bawu . . . Beno ke tuba, “Ba ke sala yawu?” Oh, ya kieleka. Ba ke sambila bawu. Na yina beno nata bawu. Kana Mfumu zola, beto ke vwnda awa, beto ke sambila na bantu nyonso. Samu ti, mu ke na kuwa ti kubenda yina ya tatu me banda na kusala, beno me mona, na—na kati ya munu. Mpe mu—mu—mu zola kusambila samu na bantu nyonso.

³² Ntangu yayi ti beto baka, na suka yayi na Masonuku ya ntama ya ntangu nyonso kisika mu bakaka kaka na nswalu mazono na nkokila, mu vwandaka na mpongi mingi, mpe sonikaka mwa Masonuku dyaka yina ke kwenda na yawu. Mpe kubaka mutindu kima na zulu. Mu kuwaka mpangi mosi ya bakala, kilumbu mosi, kusadila bisono yayi. Mpe mu banzaka . . . Mu sonikaka yawu. Mu banzaka, “Mbote, mu banza ti mu ke sonika yawu, samu ya lendaka vwanda mfunu mingi kilumbu.”

Bambala mingi beto ke salaka yawu. Mu ke tala, mingi ya beno awa, kele na kitini ya mukanda na beno. Mpe mulongi lenda tuba kima mosi, mpe kuna dyambu yina ke—ke simba beno, kima mosi ke bula na kati ya beno. Mpe kuna kana Mpeve-Santu ke na kusalaka yawu, na yina beno ke banda na kutunga na kisika yina kuna, nsangu samu na Mfumu. Mpe ya kele ya kulunga. Mu me talaka na balukutakanu, bisika nyonso mu ke kwendaka, milongi mpe bantu ke na kusonika kaka. Ya kele mbote. Beto—beto kele awa, ya kele samu na yina beto kele awa, samu na kumeka na kusadisa mosi na yankaka na ntwala na banzila yayi.

³³ Mpe ntangu yayi beto baka na Apocalypse, kapu ya 3, na bansungi ya dibuundu, kuvutukila nsungi mosi ya dibuundu. Kasi ntangu yayi beto kele . . . beto . . . kuna. Yinga. Mu lenda baka disonuku yayi, mpe na Mpeve-Santu, kulonga na zulu ya Yawu bamvula nkama mosi mpe kubaka ve nyonso yina kele

na Yawu. Samu ti, na masonuku mosi yayi, mutindu masonuku nyonso yankaka ya Biblia, Yawu nyonso ke vukanaka kintwadi.

Mpe mu zola kubaka dilongi ya munu, na suka yayi, mutindu yayi: *Wapi mutindu mu Lenda Kununga?* Ntangu yayi, mu me soola yayi samu ti mu banza ti ya kele ntangu ti beto fwana bika ata mbala mosi ve Mpeve ya reveil kufwa. Beto fwana bumba reveil, kuvwanda ntangu nyonso na reveil, konso kilumbu. Paul tubaka ti yandi zolaka “kufwa konso kilumbu, samu ti Klisto kuzinga.” Mpe beto fwana bika ata mbala mosi ve reveil yina kufwa, na kati ya beto.

Ntangu yayi, Apocalypse, kapu ya 3, mpe kubanda na nzila ya 21, beto ke tanga yayi.

Na yandi yina ke nunga mu ke pesa yandi muswa ya kuvwanda na munu na kiti ya munu ya kimfumu, mpe mutindu munu. . . kununga, mpe kele ya kuvwanda na Tata ya munu na kiti ya yandi ya kimfumu.

Yandi yina kele na dikutu, ti yandi kuwa yina Mpeve me tuba na mabuundu.

³⁴ Beno me tala mutindu ba me tula yawu? Beno me mona? “Ke vwanda na Munu na kiti ya Munu ya kimfumu,” ve “*na zulu* ya kiti ya Munu ya kimfumu.” “*Na* kiti ya Munu ya kimfumu,” yina kele na kati ya kimfumu ya Yandi. Beno me mona? Mpe kuna, mutindu—mutindu Klisto kele Mfumu, Mfumu ya kiti ya kimfumu na ntangu yayi, ya kimfumu ya muvimba ya Nzambi, mutindu mosi Dibuundu ke vwanda na Yandi, Kento ya makwela ke vwanda na Yandi, na kiti ya Yandi ya kimfumu, na kimfumu ya muvimba. Beno me mona? Ve “*na zulu* ya kiti ya kimfumu ya Munu,” kasi “*na* kiti ya Munu ya kimfumu,” beno me mona, kisika nyonso kimfumu ya Yandi ke tandama. Kiti ya kimfumu ke vwandaka na zulu ya kimfumu mosi, mpe—mpe kimfumu ke tandamaka kaka tii na bandilu ya yawu. Mpe yayi kele kubanda Seko na Seko. Beno banza kaka na yawu!

³⁵ Ntangu yayi, na yina beto ke longuka yayi, lukanu ya munu na yayi kele kaka ve kukwiza awa samu na—na kubundana na beno. Kima, mu zola mingi kusala. Kasi kana—kana mu vwandaka na siansi ya kusala yawu, mu ke kwiza na yinzo ya beno, mpe ke pesana mbote na beno mpe ke zonza na beno, mpe kuvwanda, kudya na beno; mpe kuvwanda, na yisi ya mpewo ya yinti, mpe kuzonza mpe kubundana fyoti.

Kasi ntangu beto ke kwizaka awa, beto kele awa samu na lukanu mosi ya kieleka. Yayi kele yinzo ya kusungika. Yayi kele kiti ya kimfumu. Yayi kele kiti ya kimfumu ya Nzambi, mpe lufundusu ke tubamaka na yinzo ya Nzambi. Mpe awa kele kisika beto ke vukanaka, kintwadi na zola, na mosi na yankaka, mutindu kaka Baklisto lenda zolana. Kasi, na kati awa, beto—beto kele na yisi ya ntwadusulu ya Mpeve-Santu. Mpeve-Santu kele na kati-kati ya beto. Mpe beto kele awa na kuvwanda. . .

samu na kukifyongonina na kati ya beto, samu na kumona kisika ya beto ya mbwisulu, yimbi ya beto, mpe mutindu beto lenda kuma kubanda kisika beto fwana vwanda, na kisika beto fwana vwanda ntangu yayi; kisika beto kele, mpe kisika beto fwana vwanda. Mpe ya kele yina beto ke longuka. Milongi ke longuka bisika yina, samu na bantu ya bawu. Ntangu ba ke mona bantu, kukondwa, kuna ba ke banda na zulu ya yawu.

³⁶ Ntangu yayi, ntama mingi ve, mu banza ti dibuundu na kutala zolaka mata kaka fyoti na zulu na ntangu yayi. Mu kele na dibanza ve ya kusala yawu na suka yayi, na kulakisa bima yayi. Kasi mu—mu banza, na mwa ntangu fyoti, kana Mfumu kuzola, ntete beto longa na Bampungu yina, Mu zola ku—ku—kunata na Dibuundu kima kaka yina—yina beno fwana zaba, mu banza, na ntangu yayi.

³⁷ Mpe ntangu yayi beto ke na kuzonzila na yayi, “kununga.” Mpova *kununga*, ya kieleka, beno zaba yinki ya zola kutuba. Beno fwana kuzwa kima ya kununga. Mpe nsungi ya dibuundu yayi yina Mpeve-Santu vwandaka zonzila awa, na Nsungi ya Dibuundu ya Lawodise, mutindu beto vwandaka me tala kaka yawu, vwandaka na nsatu ya nsembolo. Laodicée zolaka vwanda ya kusemba, samu na luswaswanu ya yawu—ya yawu na ntwala ya Klisto. Ya tulaka Klisto na ngaanda, na—na nsungi ya bawu. Mpe Klisto vwandaka na ngaanda, vwanda meka na kuvutuka na kati. Yina kele zola. Na manima ba me tula Yandi na ngaanda ya yinzo ya Yandi Mosi, vwandaka meka na kuvutuka na kati, mpe tubaka, “Yandi yina ke zibula mwelo, Mu ke kota na yandi.” Beno me mona? Dibuundu, yawu mosi, na muvimba, me tula Yandi na ngaanda.

³⁸ Kasi ntangu yayi beno tala. Mbokolo ya Yandi awa kele ve kaka na dibuundu. “Yandi yina ke nunga.” Beno me mona? Dibuundu ve; yina ke vwanda yandi, beno me mona, nzutu ya dibuundu. Kasi ya kele “yandi yina ke nunga,” muntu yina ke nunga, ntangu yayi.

³⁹ Mpe Laodicée fwana kuzwa yina me lunga na yandi. Ntangu yayi beto ke mona, na yina, na kuzabaka ti yayi kele Nsungi ya Laodicée, mpe beto zaba ti laodicée yayi kele na nsatu ya kusemba ya nene ya Nzambi. Yawu kele na nsatu ya nsembolo ya nene. Mpe na ntangu bisyelo ya beto ke kuma kieleka ya pete mpe ya kulemba, mutindu nkooko mosi ya bakala ya kukula na mitekolo ya yandi, nyonso yina bawu ke sala kele ya kulunga. Mpe bawu kele. . .

⁴⁰ Ba me tubaka mingi, ti Nzambi kele Nzambi mosi ya mbote, tii kuna bawu me meka na kukumisa Nzambi kaka nkooko mosi ya bakala ya nene ya kulemba. Beno me mona? Kasi Yandi kele ve. Yandi kele Tata, mpe Tata ya ludedomo, yina ke sungikaka. Mpe luzolo kele ntangu nyonso kusungika. Beno me mona?

Zola ke sungikaka. Ata mutindu ya ke sala mpasi, yandi ke sungika dyaka.

Mama ya kieleka ke sungika bana ya yandi. Tata ya kieleka ke sungika. Beno me mona? Kana beno kuma kaka ya pete mpe ya kulemba, mpe beno bika yawu . . .

⁴¹ Mu vwanda sabuka dinkuni mosi ya ntama kilumbu yankaka yina, na yisi ke lutaka maza, to yina ba ke bokilaka dibengi. Mpe mu dumukaka na zulu ya dinkuni yayi. Na ngaanda, ya vwandaka talana mbote, vwandaka talana mutindu dinkuni ya nene ya ntama ya hêtre. Kasi na ntangu mu dumukaka na zulu ya yawu, oh, kitini ya yawu ya nene kubwaka. Ya vwandaka ya kubola mingi mpe ya kulemba. Mu tubaka, “Ya kele mutindu Baklisto ke na kukumaka.” Ba me kufwaka na disumu mpe na masumu, ntama mingi, ti ba me kuma ya kulemba. Ba lenda nata ve kilo, ata fyoti. Ba—ba zaba ve yina zola kutuba kununga. Mpe kuna, mu bandaka na kubanza na dilongi yayi. Kununga, kubumba Luzingu na kati ya beno. Ntangu luzingu basikaka, ya kele yina nataka dinkuni yina na mutindu yina. Beno me mona? Mpe ya kumisaka yawu yimbi mingi kulutila na yina ya vwandaka na kati ya yinto kisika maza vwandaka.

⁴² Mpe na yina, kuna, beno baka Muklisto, yina fwana vwanda Muklisto, bika ti Luzingu ya Nzambi kubasika na yandi, mpe kimbangi, kyese ya kusadila Klisto; mpe, kuzinga na dibuundu kisika mutindu ya bima ke na kusalamaka, yandi ke bola bambala zole na nswalu, ya kieleka, na kuzingaka kaka na yinsi ya yawu.

⁴³ Na yawu, kana beto ke na kumeka na kulanda Nsangu ya ngunga, to na kitini yayi ya Nsangu, beto fwana kuzinga ntangu nyonso na kati ya Luzingu ya Klisto. Beno me mona? Samu ti, kana ve, beno ke yenga-yenga, mpe zaba ti bima yayi yina beno fwana sala, mpe beno ke salaka yawu ve, Biblia ke tuba, “Yandi yina zaba kusala mbote, mpe ke sala yawu ve, samu na yandi ya kele disumu.” Na yina beno ke kuma ya kulemba, ya kubola, ntangu beno me kabuka na Luzingu ya Nzambi. Na yawu, beno nwana na nyonso yina kele na kati ya beno, samu na kuvwanda na kati ya Luzingu ya Klisto, ti beno ke vwanda munati-mbuma.

⁴⁴ Beto ke mona nsungi yayi yina beto ke na kuzinga. Ya kele mosi ya bansungi ya nene nionso ya bansungi nionso. Nsungi ya Dibundu ya Laodicée yayi kele ya kulutila nene na bansungi nyonso ya dibundu, samu ti ya kele nsuka ya ntangu mpe kuvukana na Seko. Mpe, dyaka, ya kele nsungi ya kulutila nene na disumu. Ya kele na disumu mingi na nsungi yayi kulutila na yina me vwandaka ntete. Mpe bangolo ya Satana kele—kele bambala mingi ngolo na kunwana kulutila bansungi nyonso. Beno me mona?

⁴⁵ Awa, ntama kuna na bansungi ya ntete, Muklisto zolaka, samu na kutubaka vwandaka ya dibuundu . . .vwandaka ya

Klisto, ba zolaka zenga yandi yintu samu na yawu. Ba zolaka kufwa yandi, mpe kubasika yandi na mpasi ya yandi, mpe kukwenda kutana Nzambi, na nswalu.

Kasi ntangu yayi mbeni me kota, na nkumbu ya dibuundu, mpe ya ke na kuvuna mingi. Yayi kele nsungi ya nene ya luvunu. Kuna, Klisto tubaka yawu, “Bampeve nyonso zole ke vwanda ya kubelama mingi na bilumbu ya nsuka tii ya ke vuna Misoolami ya kieleka kana ya lendaka salama.” Beno me mona? Beno me mona? Beno me mona? Beno bambuka moyo, Klisto zonzilaka na bantu ya kusoolama na kilumbu ya nsuka. Beno me mona? “Ya ke vuna Misoolami ya kieleka kana ya lendaka salama.” Ya kubelama mingi! Bantu ke zinga, bantu lenda zinga luzingu ya mpembe, ya santu; kuvwanda ve misumuki, bantu ya ke salaka pite, mpe binwe, mpe mivuni, miyibi. Ba lenda zinga na zulu ya yawu, mpe dyaka kukondwa Yawu.

⁴⁶ Yayi kele nsungi ya Luzingu, Luzingu ya muntu ya Klisto, kisika, kima ya Nzutu ya Yandi, yina vwandaka na kati ya Yandi.

Ya ntete, na yisi ya kunungisama, mbotika ya maza. Ya zole, na ysi ya Mbutukulu ya malu-malu, ya Wesley, kusantisama, yina ke sukulaka. Mpe ya tatu, na yisi ya mbotika ya Mpeve-Santu, na kukotisaka na kusalu vaze yina ya kusantisa. Beno me mona? Mpova *kusantisa* zola kutuba, ya kele mpova ya kuvukana na Grec yina zola kutuba “ya kusukula mpe yina ba me tula na lweka samu na kusalu,” yina ba me tula na lweka samu na kusalu. Ntangu yayi Mpeve-Santu me kotisa yawu na kusalu. Beno me mona?

⁴⁷ Mpe beto ke tala, “Ntangu mpeve ya yimbi ke katuka muntu, yandi ke kwenda kutambula na bisika ya kuyuma.” Yawu yina dibuundu me sala, ba-Baptiste, ba-Methodiste, bayina ke kwikilaka na kusantisama. “Na yina,” Yesu tubaka, “mpeve ya mvindu yina me basika, ke vutuka na nzutu dibuundu yayi mpe ke kuta yinzo ya kubongisa, ya kukomba mbote, ke na kuzinga ya kuvedila, ke zinga kukondwa mvindu.” Mbote mingi. “Kasi na yina kana yinzo yina kele ve ya kifuluka, na bima, kuna yandi ke kwiza na bampeve sambwadi yankaka ya yimbi kulutila na yina yandi vwandaka, mpe nkadulu ya nsuka ya kisika yayi ke vwanda yimbi bambala sambwadi kulutila na yina ya vwandaka na kisika ya ntete.” Ya zolaka vwanda mbote mingi na bawu na kuvwanda ba-Lutherien, ti kuzwa Nsemo yina mpe kukondwa kulanda Yawu. Mutindu mosi samu na bantu ya Pentecote, beno me mona, beno zaba yina mu zola kutuba, yinzo ba me bongisa.

⁴⁸ Mutindu mu vwandaka tuba na muntu mosi, kilumbu yankaka yina, mu tubaka, “Ba ke na kukeba mingi, ata mpe bimvuka mingi ya bantu ya santu, na kubokila ve Mpeve-Santu, ‘Mpeve-Santu,’ samu ti ba ke kukifwanikisa na ba-Pentecotiste na ntangu ba ke sala yawu. Ba ke tuba, ‘Mpeve-Santu,’ beno me mona, ke keba na kutuba, ‘Mpeve-Santu.’” Samu ti, bantu ya

Pentecote, bantu ya mutindu nyonso, ke bokilaka kaka Yawu yina Biblia ke tubaka, “Mpeve-Santu.” Na yina, Mpeve-Santu na Mpeve ya Santu kele kima mosi. Kasi ba ke keba mingi na yawu. Ba ke zola ve kukifwanakana na bantu yina ke zonzaka na bandinga; mpe yina kele Mpeve-Santu, Yawu mosi. Beno me mona?

Yinki salamaka na manima? Na ntangu mbeni, yina basikaka na yisi ya kusantisama, ya yina ba sukulaka, kuvutukaka mpe monaka yinzo ya kifuluka ve na Mpeve-Santu, awa nkadulu ya dibuundu me vukana na—na kimvuka ya mabuundu, na Lukutakanu ya Yinza ya Mabuundu. Mpe ya kele nkadulu awa yina ke vukisa yawu na malongi ya Katolika ya Rome mpe nyonso yankaka ya yawu, mpe ntangu yayi ya kele bambala sambwadi kulutila yimbi na yina ya vwandaka ntangu ya basikaka na malongi ya Luther. Ya kele kisika muntu ke nata yawu.

⁴⁹ Mpe na yina beno tala Nsuugi ya Dibundu ya Laodicée na manima ya kuzwa Mpeve-Santu, mpe na luzabu mpe Mpeve ya Nzambi na kati ya Yawu, mpe kuna bisalu ya Nzambi ke mangama na yawu, mpe ke bokila Yawu “kisalu ya yimbi.” Na yina wapi mutindu samu na yawu? Ya kele kisika ba tulaka Klisto na ngaanda ya dibuundu ya Yandi Mosi. Beno me mona? Yandi. . . Ya lakisaka Yandi ata mbala mosi ve na dibuundu tii kuna ya kumaka na Laodicée; mpe na ntangu Yandi kumaka na Laodicée, ba tulaka Yandi na ngaanda ya dibuundu ya Yandi, vwanda meka kuvutuka na kati.

⁵⁰ Ntangu yayi, beno me mona, kunungisama ata mbala mosi ve tulaka Yandi na kati. Kusantisama kusukulaka kaka kisika samu na Yandi. Kasi ntangu mbotikaya Mpeve-Santu kukwizaka, ya kotisaka Yandi na kati ya bantu. Mpe awa ba tulaka Yandi na ngaanda, na ntangu Yandi bandaka na kukilakisa Yandi mosi, ti Yandi kele mutindu mosi mazono, bubu yayi, mpe ntangu nyonso. Ba tulaka Yandi na ngaanda samu ti bawu salaka denomination, mpe Mpeve ya Mfumu ke wisana ke ve na denomination ya bawu. Beno me bakula ntangu yayi? Ti, ba tulaka Yandi na ngaanda. “Beto zola kima ve ya kusala na télépathie yayi. Ya kele—ya kele ya dyabulu. Ya kele kutuba mambu na ntwala. To. . .” Beno me mona?

Ba ke bakula ve. “Meso, mpe lenda mona ve; makutu, mpe lenda kuwa ve.” Beno me mona? Nzambi kaka ke zibulaka meso mutindu Yandi zola. “Yandi ke kumisa ngolo yina Yandi ke kumisa ngolo, yina Yandi zola, mpe—mpe—mpe ke pesa Luzingu na bayina Yandi zola.” Ya kele yina Masonuku ke tuba.

⁵¹ Ntangu yayi, beto ke mona bangunga yayi na kati ya yina beto kele, na nkadulu yayi, mpe beto ke mona yina ya vwandaka. Mpe Mpeve-Santu ke na kusemba nsungi yina tulaka Yandi na ngaanda. Kasi, na nyonso yina, beno talaka, “Na yandi yina ke

nunga”? Ata na nsungi ya dibuundu yina, ya nkadulu ya yinza ya yimbi, “Yandi yina ke nunga.”

⁵² Beto ke tala awa ti Nzambi ke vwandaka ntangu nyonso na banungi. Yandi me kuzwa banungi na konso nsungi. Ya ke vwandaka ntangu nyonso, na konso ntangu, na konso nsungi yina vwandaka na zulu ya ntoto, Nzambi ke vwandaka ntangu nyonso na muntu yina Yandi lendaka tula maboko ya Yandi na zulu, mutindu mbingi na zulu ya ntoto. Ata mbala mosi ve ti yandi me vwandaka ya kukondwa kimbangi, ata bantangu yankaka kaka muntu mosi. Kasi muntu vwandaka nunga, ntangu yayi, mutindu basantu ya ntama.

⁵³ Mpe muntu mosi ya mbote mingi, kizabi, vwandaka tuba, na manima ya *Bidimbu Sambwadi*, yandi tubaka, “Mpangi Branham, nge na kuvwandaka muntu ya bifwanukusu, typologue, na kisika,” yandi tubaka, “wapi mutindu na yinza nge ke tula Dibundu yina na Enlevement kukondwa ntangu ya Lukwamusu, na kifwanukusu?” Yandi tubaka . . .

Beno me mona, kana ya kele kifwanukusu, ya fwana vwanda . . . ya fwana vwanda . . . Kana ya kele na kifwanukusu ya kuswaswana, ya fwana vwanda na kifwanukusu samu na kifwanukusu yina na kuvwanda. Mpe nyonso mu ke tuba, ti kele kieleka, kele na kifwanukusu. Ya kele na kifwanukusu. Beno kele na kivudi. Mpe Biblia ke tuba, “Bima ya ntama vwandaka kivudi ya bima ya malu-malu yina ke kwiza.”

Yandi tubaka, “Kasi ntangu yayi nge ke baka Ngwisani ya Ntama mutindu kivudi. Ntangu yayi,” yandi tubaka, “yinki nge ke sala na Dibundu yayi?”

⁵⁴ Muntu yayi me katuka . . . Muntu ya nene, mulongisi ya nene yina kele nkundi ya munu ya luzolo, muntu ya mbote mingi, mpe yandi kele mpangi mosi ya mbote. Mu—mu ke lenda ve kutuba dyambu mosi ya yimbi na zulu ya mpangi ya bakala yayi. Mu ke lenda ve, na mutindu nyonso. Mutindu—mutindu . . . Mutindu Muklisto, mu lenda tuba ve kima ya yimbi na zulu ya yandi. Yandi—yandi—yandi ke wisanaka ve na munu na zulu ya dyambu yina, kasi yandi—yandi kele mpangi ya munu ya ntalu. Beto ke kudyaka kintwadi. Mpe, oh, yandi kele kaka muntu mosi ya mbote mingi. Mu ke bakaka bamagazine ya yandi, mu ke tangaka masonuku ya yandi. Mpe yandi ke sonikaka yankaka ya munu, mpe nyonso yina. Mpe mu me bakaka masonuku mingi na yina mu—mu me tangaka—me tangaka na masonuku ya yandi, na kuwaka yandi kutuba. Yandi kele muntu ya nene, kasi yandi—yandi lenda kaka ve kuwisana na munu. Mu me sepela na yawu, na bukieleka ya yandi. Ata ti yandi ke ndima kaka ve, yandi kele ve mosi ya bazuwe yayi, yina ke ndimaka kaka nyonso beno ke tuba. Yandi kele na kundima ya yandi mosi, mpe yandi ke telama na yawu. Mu ke sepela na yawu. Mpe yandi kele muntu ya mbote.

Oh, mu—mu kele ve mulongisi to kizabi, na nyonso, kasi muntu yayi kele mulongisi mpe kizabi.

⁵⁵ Kasi mu—mu ke wisana na yandi ve, samu ti mu ke mona yawu ve. Kasi, ya me tala ve mpulusu, ya ke tala Nkwizulu ya Mfumu. Yandi ke tala ti Dibuundu fwana luta na ntangu ya Lukwamusu, samu na kuvwanda ya kuvedisa. Mu ke tuba Menga ya Yesu Klisto vedisaka Dibuundu. Beno me mona? Ya kele ve na nsatu ya . . .

Mu ke kwikila ti dibuundu ke luta na ntangu ya Lukwamusu, dibuundu organisation, kasi Kento ya makwela ve. Beno ke sola kento yina beno fwana vedisa ntete beno kwela yandi? Beno me mona? Kento ya makwela ya Klisto kele ya kusola, mpe Yandi kele ya kusola. Mpe Yandi kele Kento ya makwela ya Nzambi, Kento ya makwela ya Yesu Klisto.

⁵⁶ Mpe ntangu yayi yandi tubaka, “Wapi mutindu nge ke pesa kifwanukusu na yawu, kana Kento ya makwela yina kukwenda, kumata na zulu ntete Yandi luta na ntangu ya Lukwamusu?” Yandi tubaka, “Mu kele na Disonuku yina ke lakisa nge ti Dibuundu ke vwanda na ntangu ya Lukwamusu.”

Mu tubaka, “Tanga kaka Kidimbu ya Sambanu, yimeni, yandi kele kaka kuna na yisi ya Lukwamusu. Kasi tala, kaka ntete yina, Kento ya makwela me kwenda. Nge me mona? Yandi kele na Nkembo na ntangu yina. Yandi kele na nsatu ya kuvwanda ya kuvedisa ve.” Beno me mona?

“Yandi yina ke kwikila na Munu kele na Luzingu ya kukonda nsuka, mpe ke kota ve na kitumbu to na Lufundusu, kasi me luta lufwa na Luzingu.” Klisto pesaka nsilulu ti beto ke telama mpe ve na Lufundusu. Na yawu na kimpwanza Yandi bakaka kisika ya munu, kubanda kuna mu kele na kimpwanza. Ntangu ba me lemvočila munu, mu kele ya kulemvočila. Wapi mutindu Yandi lenda basisa munu na butiki ya lufutu, na kitansi ya kieleka, kana . . . Wapi mutindu Yandi lenda vwanda Mukudi ya munu, mpe kubasisa munu na butiki ya lufutu, mpe kidefisi ke landila na kutuba ti mu kele ya yandi? Mu kele na kitansi ya kusunika, amen, beno me mona, ya kusunika na Menga ya Yesu Klisto. Beno me mona? Ntangu yayi, na yina, awa kele kisika beto ke na kwiza.

Yandi tubaka, “Ntangu yayi, wapi mutindu nge ke kuzwa, ke kabula Kento ya makwela ya kusola yina nge ke na kuzonzila ntangu yayi, wapi mutindu nge ke tula Yawu na kifwanukusu?”

⁵⁷ Mu tubaka, “Mbote mingi.” Mu tubaka, “Yawu yayi. Ntangu yayi, na Matthieu, kapu 27 mpe na nzila ya 51.” Kana beto . . .

Beno bika mu tanga yawu, mpe kuna beto—beto ke kuzwa yawu mbote. Na yina beto ke tala kana ya pesamaka na kifwanukusu to ve, kana ya kele Kento ya makwela ya kusolama. Matthieu, kapu 27 mpe—mpe nzila ya 51. Mbote mingi. Beto ke tanga yayi, na kulunsi ya Mfumu ya beto.

Mpe, tala, vwale ya tempelo kupasukaka na zole kubanda zulu na yisi; . . .

⁵⁸ Ntangu yayi, yina vwandaka musiku. Musiku sukaka kaka kuna. Samu ti, vwale vwandaka kanga dibuundu na bima ya santu ya Nzambi. Kaka nganga-Nzambi ya kupakula vwandaka kota kuna, mpe, yina, mbala mosi na mvula. Beno ke bambuka moyo? Ntangu yayi, Nzambi, na diboko ya Yandi Mosi, beno tala, “kubanda zulu na yisi,” ve kubanda yisi na zulu. Ya vwandaka yinda bametele kumi na zole. Beno tala, ve kubanda yisi na zulu, kasi “kubanda zulu na yisi,” na kulakisaka ti ya vwandaka ya kusala na Nzambi. Pasulaka vwale na zole, mpe na yina, muntu nyonso, yina zola, lenda kwiza mpe kuvwanda na busantu ya Yandi. Beno me mona? Mbote mingi.

. . . kubanda zulu na yisi; mpe ntoto kuninganaka, mpe matadi kupasukaka;

Mpe bantoni kuzibukaka; mpe banzutu mingi ya basantu yina vwandaka ya kulala kuvumbukaka,

Mpe basikaka na bantoni na manima ya mvumbukulu ya yandi, . . . kotaka na mbanza ya santu, mpe monikaka na bantu mingi.

⁵⁹ Beno tala Misolami yango, Kento ya makwela yango. Dibundu nyonso ve ya Bazwife kubasikaka na ntangu yina. Bawu nyonso kusalaka munkayulu ya mutindu mosi. Bawu nyonso vwandaka na yisi ya menga yina basikaka na mwana-dimeme. Kasi ya vwandaka na Nkonga ya bantu yina ba soolaka; mpe Nkonga yina ya bantu ya kusoola, kaka na ntangu yina dyambu kusalamaka, bayina kwikilaka na Yawu na bukieleka. Ntangu yayi mu ke na kukuma na mpova *kununga*. Ntangu yayi beno simba yawu. Bayayi yina kieleka kunungaka, na kusalaka na bukieleka munkayulu mosi yina bayankaka ya bawu kusalaka, kasi, na bukieleka, kunungaka bima ya yinza. Ntangu munkayulu ya kieleka kusalamaka samu na bawu, bawu vwandaka na paladiso tii yina . . . na ntangu yina. Ntangu ntangu yina kusalamaka, ba nungaka mpe vwandaka pema, vwandaka lala; beno me mona, “banzutu mingi ya bayina vwandaka ya kulala na mfundu-mfundu,” beno me mona, vwandaka ya kulala.

⁶⁰ Ntangu yayi, kana beto vwandaka na ntangu, beto zolaka vutuka na Daniel, ntangu, Daniel, musoolami yina kunungaka. Mpe Yandi tubaka, “Kanga Buku, Daniel, samu ti nge ke pema na kisika ya nge. Kasi ntangu Mwana ya Ntinu ke kwiza, yina ke telama samu na bantu, nge ke telama na kisika yina.” Yawu yayi. Daniel, profete yayi ya Nzambi, monaka ntangu ya nsuka kukwiza. Mpe Yandi tubaka, “Daniel, nge ke telama na kisika ya nge na kilumbu yina.” Mpe awa yandi vwandaka, me basika; Israël nyonso ve, kasi kifwanukusu ya Kento ya makwela

ya Israël. Ntangu yayi, bayankaka ya Israël ke basika ve tii mvumbukulu ya bantu nyonso.

⁶¹ Mpe ntangu yayi, na Nkwizulu ya Mfumu Yesu, bayina ke zolaka ya kieleka Nkwizulu ya Yandi, bayina ke na kuzinga samu na yawu; ntangu Yandi ke monika na zulu, Dibuundu yina kele ya kufwa na kati ya Klisto ke vumbuka, mpe bawu ke soba na mwa ntangu fyoti. Bayankaka ya bawu ke zaba kima ve na yina me tala yawu. Beno bambuka moyo, “Bawu kumonikaka na bayina vwandaka na mbanza.” Beno me mona? Enlevement ke vwanda mutindu yina. Beto ke mona mosi na yankaka, mpe beto ke mona bawu. Bayankaka ya yinza ke mona bawu ve. Ya ke bakama mutindu nkwendolo ya kinsweki. Beto ke na kuingila ntangu yina!

Na manima kuvutuka na ntoto samu na Millenium yina ya nkembo, na yina bamvula funda. . . “Bantu yankaka ya kufwa ke vutuka ve na bamvula funda.”

⁶² Mpe kuna ke kwiza mvumbukulu ya bantu nyonso, kisika, Israel nyonso. . . Mpe dyaka, beno tala, kuna bantumwa kumi na zole, bankooko kumi na zole, bawu nyonso ke monana. Mpe beto me kuma ntete ve na kisika yina. Mu banza, kana Mfumu zola, beto ke kota na yawu na Ngwisani, mutindu ti bibaka yina ya jaspe, mpe matadi kumi na zole, myelo kumi na zole, balufulu kumi na zole, nyonso ya yawu ya kumonikisa. Awa bawu kele na bakiti kumi na zole ya kimfumu, bawanzio-minati nsangu ya bilumbu yango, samu na kupesa lufundusu na bayina mangaka nsangu ya bawu. Amen. Kuna ke kwiza ngunga yina ya nene. Yinga.

⁶³ Wapi kilumbu, wapi ntangu beto ke na kuzingila! Mutindu ti beto zolaka kukitala, Dibuundu. Ntangu yayi beto ke zonzila na bima yayi ke na kwiza, yina ke kwiza. Ntangu yayi, bubu yayi, beto vutuka awa mpe beto mona, beto kukitala mpe beto mona kana beto kele ya kusungama na Lukwikilu.

⁶⁴ Ntangu yayi beto zonzila na mwa baminuti fyoti na mwa minungi, na bilumbu ya ntangu ya Noé, yina Yesu Klisto pesaka kifwanukusu, na mutindu ya bubu yayi.

Mu zolaka kuzwa baminuti kumi. Awa mu ke vwanda ndambu ya ngunga. Mu ke banda, kaka na paze ya ntete. Mu ke bika yankaka ya yawu, kana mu lenda, mpe kuzwa yina. . .

⁶⁵ Na ntangu ya Noé, kifwanukusu ya bubu yayi: Yesu vutukilaka yawu, mpe tubaka, “Mutindu ya vwandaka na ntangu ya Noé, mutindu mosi ya ke vwanda na Nkwizulu ya Mwana ya muntu. Na ntangu ya Noé, mutindu mosi ya ke vwanda na Nkwizulu ya Mwana ya muntu.” Beno tala, ya vwandaka na kufuluka nyonso yina ya maza na yinza, mu banza na mafuku ya bantu, ya vwandaka na minungi nana. Bantu nana kunungaka, bayina vwandaka ya kieleka, minungi ya kieleka. Ya vwandaka na bana tatu ya Noé na bakento ya bawu, mpe Noé

na kento ya yandi. Minungu nana, ti kotaka na nzasa na ntangu ya kulunga. Wapi mutindu bawu salaka yawu? Bawu kuwaka Ndinga ya Nzambi. Bawu vwandaka ve na ngaanda ya kyelo. Bawu vwandaka na kati ya kyelo.

⁶⁶ Oh, bankundi ya munu ya luzolo, beno bika ve ti kyelo yina kukangama. Yesu tubaka, “Mutindu ya vwandaka na kilumbu yina, mutindu mosi ya ke vwanda na Nkwizulu ya Mwana ya muntu.” (Matondo na nge, mpangi ya bakala.) “Mutindu mosi ya ke vwanda na Nkwizulu ya Mwana ya muntu.” Ntangu yayi, ya ke vwanda na muntu ke vwanda na ngaanda ya kyelo yina.

Mingi ya bawu zolaka vwanda na mabanza ya mbote, mpe, “Kilumbu, kana bima ya mutindu yina kusalama, beto ke kota kuna na Mpangi Noé, samu ti yandi kele muntu ya mbote.” Kasi, beno me mona, kaka nana vwandaka na kati.

⁶⁷ Ntangu yayi, beno banza na ngolo awa. Kana beno ke na kuyenga-yenga, ke na kulemba, beno kota. Sala mbangu, na nswalu, samu ti kyelo lendaka kangama na ntangu mosi.

⁶⁸ Mpe ya ke vwandaka ntangu nyonso na nzasa na lundilu ya Nzambi. Ya vwandaka na nzasa na bilumbu ya Noé, samu na mpulusu ya bantu ya Yandi. Ya vwandaka na nzasa na bilumbu ya musiku, naza ya kimbangi. Na bilumbu ya musiku, ba vwandaka landa nzasa.

Mpe ya kele na kilumbu ya tatu ntangu yayi; mutindu na ntangu ya Noé, na ntangu ya Lot, mpe bubu yayi na ntangu yayi. Ya kele na nzasa ntangu yayi. Mpe nzasa yango kele denomination ve, to dyaka ti ya kele bisalu ya mbote yina beno ke salaka. Ya kele “na nzila ya Mpeve mosi,” Romains 8:1, “beto nyonso kele ya kubotama na kati ya Nzutu mosi, na kisika ya Kimfumu yina, mbotika mosi ya Kimpeve.” Ata mutindu mbote, ata mutindu yimbi, ata nyonso yina, beno kele na kati ya Kimfumu yina na nzila—na nzila ya mbotika ya Mpeve-Santu. Beno me mona? Ya kele kaka mutindu yina beno ke nunga. Ya kele bawu nyonso yina kele na yisi ya Menga yina basikaka, samu ti beno lenda nunga, beno mosi ve. Ya kele Yandi yina nungaka samu na beno. Beno ke vwanda na kupema.

⁶⁹ “Na yina wapi mutindu mu ke zaba, Mpangi Branham, ti mu kele na kati Kuna?” Beno tala mbote mutindu ya luzingu beno ke na kuzingila. Beno tala kaka na ziunga. Beno mona kana ya ke basika kaka na beno, na mbala mosi. To, beno fwana nwana mpe kukibenda, beno me mona, kuna beno ke sala yawu. Kasi beno meka kusala yawu ve. Beno me mekaka ntete na kusala yawu? Yinga. Kusala ve.

⁷⁰ Ya kele kaka mutindu kukotisa mwa diboko ya bebe na kati ya dibulu ya kinkuti, beno me mona. Yandi ke matisa, ke kulumusa, na zulu, mpe nyonso yina. Beno me mona? Yandi lenda sala yawu ve. “Lwata kazaka ya nge, cheri.” Yandi ke lenda ve.

Mwa diboko yina ke mata, ke kulumuka, bisika nyonso. Ya ke lomba diboko ya beno yina zaba mbote.

Oh, mutindu mu kele na kyese, mu lenda bika kaka diboko ya munu na Tata, kutuba, “Mfumu Yesu, mu ke na kulenda ve na kukota Kuna. Nge sadisa munu. Lwatisa munu kazaka.” Mu me bika kumeka. Beno bika kaka Yandi kusala yawu. Beno me mona?

⁷¹ Kana mwa bebe ke landila na kumeka, “Oh, mu lenda sala yawu. Mu lenda sala yawu.” Mpe yandi ke kwenda kaka bisika nyonso. Yandi lenda sala yawu ve.

To dyaka beno lenda, to dyaka munu lenda, kasi kana beto bika kaka mpe ti kubika Yandi kusala yawu. Kubika kaka Yandi, “Awa, Mfumu, munu yandi yayi. Ti mu vwanda kaka—kaka kima ve. Mu—mu me bika. Nge tula diboko ya munu na kisika ya kulunga.” Yawu yina lunungu. Yina kele kununga.

⁷² Kima beno fwana kununga kele beno mosi, dibanza ya beno, kima ya beno, mpe beno kukipesa na Yandi. Yandi nungaka samu na beno. Yandi zaba nzila; beto zaba ve.

⁷³ Kasi na ntangu ya Noé ya vwandaka na minungi nana, mpe ya kele bayina kotaka. Bawu vwandaka na kati.

Ntangu yayi beno tala, bankundi. Mu banza ti ba ke na kubakaka na bande yayi. Mpe kana ya kele na televisyo, to na tele- . . . beno lemvokila munu, na bande. Nyonso yina beno ke sala, beno bayina ke na kuwa ntangu yayi, to yina ke kuwa na manima, ngunga me luta mingi, mpe beno kele na dibanza ya mbote, kasi beno vwanda na kati. Ntangu yayi, beno nwana ve. “Ve yandi yina zola, to yandi yina ke kima mosi, kasi Nzambi.” Beno bika kaka Nzambi. Beno kukipesa kaka na Yandi mpe beno landila na kutambula, na lukwikilu ya kulunga, ya kusepelisa, ti, “Yina Nzambi silaka ti Yandi kele na lenda ya kusala yawu.” Ve na kuvukanaka na denomination mosi, na denomination yankaka, na kukimaka *awa, kuna*, to kisika *yankaka*, na kumekaka *yayi*. Beno kukipesa kaka na Nzambi, mpe beno tambula na Yandi, na ngemba, na malembe, kukondwa kikaku. Beno landila kaka na kutambula na Yandi. Ya kele kieleka.

⁷⁴ Yawu yina mu tubaka na mpangi ya beto ya bakala yina kuzwaka depression. Beno me mona? “Pesama kaka na Yandi. Yandi kele awa, Yandi Yina zabaka yina nge me sala, mpe yina me nata nge mpe na kusala mutindu *yayi*, mpe nyonso yina. Yandi zaba nyonso na zulu ya nge, mpe awa Yandi me tuba kaka na nge yina ya kusala. Ntangu yayi,” mu tubaka, “kima kaka nge fwana sala kwenda sala yawu. Ya kele, kuzimbana nyonso ya ntama, tambula, zinga samu na bilumbu na ntuala, na Nkembo mpe Mvwandulu ya Nzambi.”

Minungi nana.

⁷⁵ Na bilumbu ya ntangu ya Daniel, ya vwandaka na minungi yiya yina lendaka kutelama na kumekama ya tiya mpe ya nkosi.

Ntangu yayi, beto ke na kuingila na kuvwanda ya kumekama. Yina kele leso ya mbote samu na mpangi ya munu—ya munu ya bakala na manima kuna, mpe. “Yandi yina ke kwiza na Nzambi fwana vwanda ya kumekama.” Ya kumekama (na yinki?) na Ndinga. Yawu yina kumekama ya Nzambi. Beno me kwikila yawu? “Yandi yina ke kwiza na Nzambi fwana kumekama.” Yina ke lakisaka kaka mwana ya kieleka, na manima, beno me mona, na kuvwandaka ya kumekama. Mpe ntangu kumekama ke kwiza. . . Beno lenda nunga ve kana ti ba me pesa beno kumekama. Mpe ntangu ba ke pesaka kumekama, ya kele na kumona kana beno lenda nunga to ve. Mpe Yesu tubaka, “Na yandi yina ke nunga,” kumekama. Kumekama kele kima ya kulutila nene yina me salamaka ntete na beno. Mu banza ti ya kele ya kusonama na Masonuku, Pierre tubaka, ti, “Kumekama ya beto kele na luvalu mingi na beto kulutila wolo ya ntalu.” Ya kele ntangu ya kumekama. Ya kele kimbangi mosi ya mbote samu na beto ti Nzambi kele na beto, ntangu beto kele ya kumekama, samu ti bana nyonso ya Nzambi ke mekamaka mpe ke tezamaka.

⁷⁶ Mpe Daniel, muntu, profete; Schadrac; Méschac; mpe Abed-Nego; Daniel vwandaka profete; mpe yina vwandaka lutangu ya Dibuundu na kilumbu yina, mu zola kutuba, Kento ya makwela. Ya vwandaka na mingi ya dibuundu, na kutala mafuku zole ya bawu kwendaka kuna. Kasi ya vwandaka. . . Yina vwandaka lutangu ya minungi. Mpe minungi yina kutulamaka na kumekama. Mpe konso munungi fwana tulama na kumekama. Mpe na ntangu bawu tubaka, “Beno manga yina Ndinga ke tuba, kana ve ba ke losa beno na dibulu ya tiya,” bawu mangaka nyonso kaka Ndinga.

⁷⁷ Mpe ntangu ba pesaka Daniel kumekama, ti yandi zolaka manga yina Ndinga tubaka, ti bawu zolaka tala na lweka ya tempelo, mutindu Salomon kusambilaka, mpe Yandi zolaka vuukisa bawu na mambu nyonso, Nzambi zolaka kuwa na Mazulu kana bawu zolaka tala na lweka ya tempelo mpe kusambila, mpe bawu tubaka, “Kana muntu kusambila na kati ya lutangu ya bilumbu yayi, mpe beto kele ba-Medes na ba-Peres, muntu lenda soba to kubalula ve misiku ya beto, muntu yina ke sala ba ke losa yandi na dibulu ya bankosi,” ba salaka yandi mutambu, yandi, mu banza ti profete yina zabaka yawu, kasi ba salaka yandi mutambu, yandi vwandaka tambula na kukikulumusa nyonso, na ntangu ya vwandaka kuma ntangu ya yandi ya kusambila, kuna, yandi zabaka, na yinsi ya Jérusalem, ba vwandaka yoka munkayulu na zulu ya autel, Daniel vwandaka ve na boma ya balangididi yina.

⁷⁸ Yandi me zangula balele ya nela, mpe me fungula bapano, mpe me fukama, mpe me nangula maboko ya yandi na Nzambi

mpe sambilaka. Samu na yinki? Kuzinga to kufwa, yandi vwandaka na lunungu. Mpe, na yawu, lunungu ya nene mutindu yina tii bankosi lendaka ve kudya yandi. Yandi—yandi nungaka.

⁷⁹ . . .Schadrac, Méschac, Abed-Nego vwandaka na lunungu mingi tii nkosi. . .tii tiya lendaka ve na kuyoka bawu. Beno zaba, lunungu kele kima ya mpasi na kuyoka, to na kudya, to kima nyonso. Beno me mona? Na yawu, bawu, bawu vwandaka na yawu.

⁸⁰ Mu lendaka baka muntu yankaka. Na bilumbu ya Lot, Yesu vutukilaka na yawu, ya vwandaka kaka na tatu yina nungaka, Lot mpe bana ya yandi zole ya bakento. Ata ve kento ya yandi; kunungaka ve. Yandi—yandi basikaka. Yandi kele kifwanukusu. Mu zola kuzwa ntangu. Baminuti makumi tatu ya munu me suka kaka awa. Beno me mona? Beno me mona? Yandi, yandi salaka mbote, yandi basikaka.

⁸¹ Ntangu yayi mu fwana pesa yayi na beno, kaka mwa ntangu fyoti. Mingi ya beno me basika, mpe. Mingi ya beno me basika na bima yayi, samu na kubaka ntelamanu ya beno, na manima beno me tala Yawu na nzila ya Masonuku mpe me tala ti Yawu kele kieleka. Beno me mona nsiamisa ya Nzambi ya Ngolo nyonso; ve na mwa, yina muntu mosi *tubaka* vwandaka kimbangi. Yina Biblia tubaka ke vwanda, mpe awa Yawu ke na kusalaka yawu. Beno me mona Yawu vwandaka Kieleka. Na yawu, beno me baka nzila, me bika Sodome, me bika denomination, me bika bima yina kukangaka beno na credo; mpe kulanda Klisto, na nzila ya Mpeve-Santu ke siamisa Yandi mosi na nzila ya Ndinga ya Nzambi yina sonamaka. Na nzonzolo yankaka, beno me baka Biblia na kisika ya credo. Beno me baka nzila, samu na kulanda.

⁸² Mbote, kento ya Lot salaka mutindu mosi, beno zaba. Yandi bakaka nzila, na kukwenda na Lot, kulanda bakala ya yandi, na bana ya yandi, na baya yandi ya luzolo, kasi Yawu vwandaka ve na kati ya ntima ya yandi. Yandi vwandaka zola dyaka yinza. Na yina ya lenda salama ti beno lenda banda, mpe kuvwanda dyaka na yinza na kati ya beno. Beno me mona? Ata mbala mosi ve ti yandi nungaka. Mpe ata ti yandi vwandaka ya kieleka na nzila, na nsuka ya nataka mbwisulu ya yandi. Yandi zolaka baka kutala yina ya nene, ya yinda, ya nsuka. Ya kele kisika ba kuzwaka yandi. Beno tala na manima ve. Beno vwanda na bansatu yina ve. Beno landila na kukwenda. Beno tula mabanza ya beno na Calvaire mpe beno landila na kukwenda na ntwala na Klisto. Beno me mona? Beno me mona?

⁸³ Yandi bandaka, mutindu munungi, kasi yandi kunungaka ata mbala mosi ve. Oh, yandi bikaka denomination. Yandi salaka yawu. Yandi basikaka na Sodome, na Lot. Kasi yandi vwanda zola kuvutuka mpe kuzenga bansuki ya yandi. Beno zaba yina mu zola kutuba. Beno me mona? Yandi vwandaka zola kuvutuka. Yandi lendaka kaka ve kutelama na kumekama. Yandi zolaka

tala dyaka na manima, samu na kumona yinki bayankaka ya bawu vwandaka sala. “Oh, beno zaba, mu vwandaka na mwa bankundi ya mbote kuna, na mutindu nyonso. Mpe, na manima ya nyonso, yayi lendaka vwanda kaka mwa—mwa muvema. Mu zaba ve kana ya lendaka vwanda ya kieleka to ve. Mu—mu kele kaka na ndinga ya muntu yayi na zulu ya yawu, ata ti yandi kele bakala ya munu. Kasi dyaka . . .” Bakala ya nge kele pasteur ya nge, na nonzolo ya kimpeve, beno me mona. “Mbote, kana ya kele kieleka to ve, mu zaba ve. Ya lendaka vwanda ti yandi, luzayikisu ya yandi vwandaka ya kieleka ve.”

Na yina, kana beno ke sepela kaka ve, beno zaba kaka ve ti Yawu kele Ndinga ya Nzambi, na yina—na yina beno lenda kwenda ve. Beno me mona? Beno fwana kukipesa ya muvimba. Beno fwana zaba. Beno tuba kaka ve, “Mbote, mu ke mona bayankaka kusala yawu. Mu ke mona kidimbu.”

⁸⁴ Beno zaba, Israel kubakaka nzila, mu lenda tuba kima mosi mpe kukotisa yawu awa. Bawu bakaka nzila, mafuku zole ya bantu, mpe sukaka na bantu zole. Kieleka. Bawu monaka bisalu ya Nzambi. Bawu monaka kumonisama ya Kimpeve. Bawu monaka bimangu ya nene, ya ngolo kusalama kuna na Egypte, mpe nyonso, mpe bakaka nzila. Kasi ya—ya vwandaka ve na kati ya ntima ya bawu. Bawu nungaka ve. Bawu kubasikaka kaka. Mpe Yesu tubaka, “Mpe bawu kufwaka na ntoto ya kuyuma,” mpe bawu kele ya kufwa ya Seko. “Mosi na mosi ya bawu kele ya kufwa,” yina zola kutuba nkabwani ya Seko. Mosi na mosi ya bawu kubolaka na ntoto ya kuyuma.

⁸⁵ Kasi ya vwandaka na bantu zole, Josué na Caleb. Mpe ntangu yawu kumaka na kisika ya kumekama, bikaku vwandaka nene mingi ti bawu kutalanaka mutindu makonko na ntwala ya bawu. Josué bokaka na Caleb, mpe tubaka, “Beto kele na lenda mingi ya kusala yawu.” Samu na yinki? “Nzambi me tuba yawu.” Mpe bawu vwandaka minungi. Bawu nungaka. Bawu vwandaka bayina kuzwaka bweso, na kati ya organisation nyonso yina ya nene ya bantu, samu na kunata Kento makwela ya kieleka, ya kusolama na kati ya yinsi ya nsilulu. Josué na Caleb na mantwala ya nzila kuna, mutindu ba-general zole, twadisaka bawu tii na nzadi, mpe sabukisaka nzadi, mpe kotaka na yinsi ya nsilulu. Samu na yinki? Bawu kwikilaka Ndinga, ata nyonso.

⁸⁶ Kuna, Dathan telemisaka. Dathan, na kisika, telamaka, mpe mutindu mosi salaka Koré, mpe bawu mekaka na kutuba, “Muntu yayi ke na kumeka na kukumisa yandi mosi na zulu ya beto nyonso; ti yandi kele ya kulutila santu na bayankaka nyonso.” Na manima Nzambi siamisaka muntu yayi ya kulunga. Bawu tubaka, “Beto ke banda kaka kimvuka ya bantu mpe beto ke sala *yayi*, *yina*, to *yina yankaka*, mpe beto ke sala ba-organisation ya beto, beto ke sala . . .” Mpe bawu kufwaka mpe kuzingaka dyaka ve.

Kasi bantu yina vwandaka na Ndinga ya Mfumu, mpe bawu vwandaka na Yawu, mpe bawu kotaka.

“Yandi yina ke banda ve; yandi yina ke manisa.” Bantu mingi ke bandaka na kutina mbangu, kasi ya kele na Mosi ke manisaka yawu. Ya ke vwanda na mabuundu mingi ke banda, bimvuka mingi ya bantu. Ya ke vwanda na Kimvuka mosi ke manisa. Ya kele minungi.

⁸⁷ Na kilumbu ya Lot, yinga, yandi zolaka kuzwa kutala mosi yina ya nene ya yinda, na manima. “Oh, mu ke bika *Kingandi* kuna, bantangu ya mbote yina beto vwanda kuzwa. Ata mbala mosi ve ti mu ke zimbana yawu.” Mpe yandi vwandaka, na ngaanda, mutindu ya vwandaka na bilumbu ya Noé. Ba tulaka yandi ngaanda, kukondwa kyadi, mpe yandi kufwaka. Mpe bloke kele dyaka ya kutelama kuna bubu yayi. Ba ke tubaka (mu zaba ve) kana beno buka kitini ya yawu mpe ya ke mena, dikunzi ya mungwa. Kana beno me monaka ntete filme ya *Sodome Mpe Gomorrhe*, beno ke mona dikunzi ya ntete ya mungwa yina telamaka kuna.

⁸⁸ Ntangu yayi, ya kele na luswaswanu na kati-kati ya dikunzi ya mungwa mpe Dikunzi ya Tiya. Beno me mona? Beno fwana baluka nzila mosi. Yinga.

⁸⁹ Beno tala, na ntangu ya Jean-Baptiste. Na ntangu ya Jean-Baptiste, ya vwandaka na sambanu yina kunungaka. Na bansungi nyonso, bawu kuzwaka minungi. Na ntangu ya Jean ba vwandaka sambanu, ya vwandaka Joseph mpe Marie, Zacharie mpe Élisabeth, Siméon mpe Anne. Bakala mpe kento, bakala mpe kento, bakala mpe kento; beno me mona, kifwanisu ya Klisto, na Dibuundu; Klisto, na Dibuundu; Klisto, na Dibuundu; Klisto, na Dibuundu. Beno me mona? Beno me mona?

⁹⁰ Beno tala, ya bandaka na muntu ya yinza. No-... Mo-... Joseph, muntu ya yinza, Joseph, nani yandi vwandaka? Kisadi-mabaya. Mpe ngangana-Nzambi, nani yandi vwandaka, beno me mona? Mulongi na yinzo ya Mfumu; Zacharie. Mpe na kuna, na Siméon, profete mpe profete ya kento. Beno me mona? . . .? . . . Kunungisama, kusantisama, mbotika ya Mpeve-Santu. Amen. Beno ke mona yawu ve? Ya kulunga. Bantu sambanu kunungaka. Bawu nyonso yankaka, bawu pesaka munkayulu ya bawu mpe nyonso, kasi bayayi vwandaka Misoolami. Bawu nungaka.

⁹¹ Beno tala konso nsungi ya dibuundu. Bawu nungaka ntangu bawu, konso mwana na konso nsungi ya dibuundu, kunungaka mpukumunu ya nsungi yina. Mu kele na Masonuku awa. Mu banza ve ti beto kele na ntangu ya kusala yawu, kasi beto zaba mosi na mosi ya bansungi ya dibuundu. Mutindu mosi ntangu yayi. Ya kele kaka mutindu muntu yina kele. . .

⁹² Beno me mona, mutindu mu tubaka na mbandukulu, beno me butama ya kununga. Mpe mbutukulu yina lenda ata mbala mosi ve kunata beno na—na Luzingu, samu ti beno me butuka

ya kununga. Mpe beno kele na yinza ya kununga, na kati-kati ya bantu ya kununga, na kati-kati ya ba-credo ya kununga, na badenomination ya kununga. Beno fwana kwiza na lunungu na mutindu mosi.

⁹³ Ya kele kaka mutindu lis. Kisika kele . . . Lis, mu banza, kele mosi ya bafololo ya kulutila kitoko yina kele. Mu ke zolaka mingi lis yina ya nene ya calla mpe lis ya kiziba. Mu banza ya kele na kima ve ya kitoko mutindu lis ya nene ya kiziba, yina ba ke bokilaka lis ya maza. Mutindu ya ke lezimaka! Ntangu yayi, wapi kisika ya ke katukaka? Ya kele nkuna ya fyoti, na yisi ya poto-poto, na poto-poto ya kiziba. Mpe mwa nkuna yina, kasi, kulezima nyonso yina ke lezima ntangu nyonso na yawu, kele kaka na kati ya yawu kuna, na yina ya kele na kati ya poto-poto yina. Kasi yawu fwana kunwana, konso kilumbu, na kuzabaka ti ya kele na kima mosi. Yawu kele ndombe. Yawu kele na mvindu. Yawu kele na poto-poto. Yawu kele na mutindu mafuta. Na kati ya mvindu yina yawu ke na kuzingila, dyaka yawu ke na kusala nzila na kati ya mvindu, na poto-poto, mpe bamaza, mpe bisika yina ke kulaka ve, tii yawu ke basisa yintu ya yawu na zulu, na nsemo, mpe kubasisa yina vwandaka ya kubumbama na kati ya yawu ntangu nyonso.

⁹⁴ Mu banza ti yina kele munungi, ti, mbala mosi vwandaka na disumu, mbala mosi salaka bima yina vwandaka yimbi, ntangu yayi ke kukikwamisa ve na yawu. Mbala mosi salaka yina vwandaka yimbi, na yawu, samu na yinki ntangu yayi kutalaka dyaka na kiziba? Beno me mona? Beno tala, beno kele . . .

⁹⁵ Nzambi, na nzila ya nsodolo ya Yandi, beno me mona, me nata nkuna yayi na luzingu, mpe yawu ke na kunwana yawu mosi, beno me mona, na kukuma na nsemo. Mpe ntangu yayi, na zulu ya nyonso yina, yawu me nunga. Beno me mona? Yawu ke na kubasisa ve yina ya yawu na yisi *kuna*. Yawu ke na kutelama, samu na kubasisa yina ya yawu.

To dyaka beno, na kati ya disumu ya beno—ya beno, mpe na kusala pité, mpe na kati ya nyonso yina beno ke zingaka. Beno ke basisa ve kima. Kasi ya vwandaka na nkuna na kati kuna, mpe yawu kukisalaka nzila tii na Nsemo. Mpe ntangu yayi beno kele na Mvwandulu ya Yesu Klisto, na Nsemo ya Mwana. Yawu basisaka yina kieleka beno vwandaka na mbandukulu. Beno me mona yina mu zola kutuba? Beno monaka Nsemo. Beno basisaka bafololo. Beno zibulaka ntima ya beno, mpe ntangu yayi beno kele lis.

⁹⁶ Beno ke bambuka moyo na dilongi ya munu na zulu ya lis? Révérend Lis, mutindu yandi ke salaka. “Mpe, kasi, yandi ke tungaka ve. Mpe dyaka, Salomon, na nkembo ya yandi nyonso, kulwataka ve mutindu mosi ya bayayi.” Yandi—yandi—yandi—yandi—yandi . . . Beno tala yandi. Yandi me yilama na . . . Yandi ke bakaka kima ve samu na yandi mosi. Lis ke talaka ve na yandi

mosi. Yinki yandi ke salaka? Yandi—yandi ke basisaka kitoko ya yandi, luzingu ya yandi, samu ti bayankaka kumona. Luzingu ya yandi ke basika, samu ti bayankaka lendaka mona nkembo, yina kele na kati ya yandi, yina vwandaka na kati ya yandi na potopoto. Ntangu yayi yandi kele na zulu.

Yawu yina munungi. Yandi me nunga potopoto. Yandi me nunga bima ya yinza. Mpe ntangu yayi yandi ke pesa yandi mosi ya mpamba. Muntu nyonso lenda tala yandi. Luzingu ya yandi, beno lenda ve kutula musapi na yawu. Beno me mona? Yandi kele munungi ya kieleka. Beno lenda ve kutuba kima na zulu ya yandi ntangu yayi. Kutuba, “Yandi me basika na potopoto.” Kasi yandi kele ve na kati ya potopoto ntangu yayi. Yandi kele na zulu ya yawu. Amen. Beno lenda ve, na yina, kulakisa yina yandi vwandaka na manima. Yinki yandi kele ntangu yayi? Yandi kele na zulu.

⁹⁷ Kuna nyosi ke luta mpe ke tuba, “Yina kele nsunga ya mananasi ya mbote. Mu banza ti mu ke kwenda mpe ke baka ndambu ya munu.”

⁹⁸ Yandi ke zibula kaka ntima ya yandi, “Kwiza kaka ntangu yayi. Mbote mingi.” Bima nyonso ke kwiza baka na yandi. Beno me mona? Yandi kele—yandi kele pasteur ya kieleka. Yandi ke lakisa Nkembo ya Nzambi. Mpe beno tala kisika yandi me katuka. Yandi zolaka nunga, samu na kusala yawu.

⁹⁹ Kilumbu mosi, bakala to kento yayi vwandaka ntwenya mpe kitoko, ya kulunga. Bawu kulutilaka na bampukumunu mingi, kasi bawu me nunga yawu. Beno me mona? Bawu me nunga. Ntangu yayi bawu ke na kulakisa kitoko ya kieleka ya Klisto na luzingu ya bawu. Beno tala, na kulutaka, na nzila ya potopoto.

¹⁰⁰ Yesu pesaka beto mbandu, wapi mutindu ya kusala yawu. Ntangu yayi beto zola kuzaba wapi mutindu ya kununga. Yesu tubaka na beto wapi mutindu ya kusala yawu. Beno me mona? Kukikulumusaka! Yandi kangaka lele na luketo, mpe sukulaka makulu ya bilandi mpe kusunaka yawu. Nzambi ya kieleka ya Mazulu kukikulumusaka Yandi mosi.

¹⁰¹ Beto zola ve kuvwanda ya kukikulumusaka. Ya kele samu na yina bakento ke zolaka ve bansuki ya bawu kukula, beno me mona, yawu yina bawu ke zolaka ve kulwata mutindu bamama zolaka lwata. Mutindu, babakala ke zolaka ve, beno me mona, ya kele kima mutindu mosi. Bawu zola ve. Ba—ba ke kuma ya kukikulumusaka.

Kasi, Yesu, ntangu nyonso! Beno tala Nani Yandi vwandaka. Bunene! Mu ke tuba kima mosi. Bunene ke kukikulumusaka. Yina kele *nene* ke kukikulumusaka. Bunene!

¹⁰² Mu kuzwaka bweso, ya kukutana na bantu ya nene. Mpe ya kele bantu yayi yina ke sobaka bilele, mpe ba-cent makumi tanu na baposi ya bawu, mpe samu na kusobisa bantinta, ya kele muntu yina ke banzaka ti yandi kele kima na yina yandi kele

kima ve. Kasi mu vwandaka pene-pene ya bantu ya nene, mu zola tuba bantu ya nene ya maboko na bapwagnye ya basemisi, ya bitende. Ba ke sala beno kubanza ti beno kele muntu ya nene. Beno me mona?

Bunene kele kukikulumusa. Beno zimbana yawu ve, Dibuuundu. Bunene ke talanaka na kukikulumusa, ve na mutindu mbote beno lenda vwanda.

Awa, mu zola ve kutuba mvindu. Mu—mu zola kutuba kuvwanda ya kukikulumusa na kimpeve. Beno me mona? Mu zola kutuba ve ti beno basika kaka mpe ti beno kukisukula ve mpe beno yobila ve. Yina, beno fwana sala yawu. Beno zaba yawu. Beno me mona?

Kasi mu ke na kuzonzila na kukikulumusa, kukikulumusa ya kieleka, ve kima ba me tula. Kima yina kele, yina kele kukikulumusa ya kieleka.

¹⁰³ Yesu tubaka na beto mutindu ya kusala yawu. Yandi nungaka. Ya zola kutuba... *Kununga* zola kutuba “kulenda kumekama,” ya kele kieleka, mutindu basantu nyonso ya ntama kusalaka; mutindu Yesu salaka: na kati-kati ya bambeni ya Yandi nyonso, Yandi lendaka kumekama. Na ntwala ya nyonso yina Yandi kumekamaka, Yandi lendaka yawu. Mpe na ntwala ya kimbevo, Yandi na kuvwandaka Mesiya, Yandi belusaka bawu. Na ntwala ya lufwa, Yandi vutulaka yawu na luzingu. Na ntwala ya Calvaire, na lufwa ya Yandi Mosi, Yandi nungaka yawu na kukipesaka Yandi mosi. Wapi mutindu? Na nzila ya Ndinga. Yandi tubaka, “Beni bebisa Tempelo yayi, mpe Mu ke vumbula yawu na bilumbu tatu.” Ndinga me tuba yawu. Beno me mona? Mpe na ntwala ya lufwa, Yandi nungaka yawu. Yandi nungaka lufwa. Na ntwala ya difelo, Yandi nungaka difelo mpe nungaka difelo. Yinga. Na ntwala ya ntoni, Yandi nungaka ntoni. Wapi mutindu? Nyonso na nzila ya Ndinga, mpe kukikulumusa. Oh, la la! Beno tala Muntu ya kieleka. Beno tala Muntu ke pesa beno mutindu. Beno me mona? Yandi nungaka nyonso, nungaka yawu.

¹⁰⁴ Beno tala. Mpukumunu vwandaka samu na Yandi. Beno zaba yawu? Biblia ke tuba, “Yandi kumekamaka na mutindu nyonso mutindu beto kele, kasi kusumukaka ve.” Yandi kumekamaka na nzila—na nzila ya kunwa. Yandi kumekamaka na nzila ya bakento. Yandi kumekamaka na nzila ya nyonso yina zolaka vwanda na nzila ya kumekama. Yandi kumekamaka na nzila ya nyonso mutindu beto kele. Yandi vwandaka Muntu, mpe kasi beno zolaka tula ve kima na zulu ya Yandi. Yinga, tata.

¹⁰⁵ *Kununga* zola kutuba “kuzaba dyabulu na mayele ya yandi nyonso.” Bantu mingi ke tubaka, “Ya kele na dyabulu ve. Ya kele kaka dibanza.” Beno kwikila yawu ve. Ya kele na dyabulu ya kieleka. Yandi kele kaka kieleka mutindu beno kele to muntu nyonso. Dyabulu kele kieleka, mpe beno fwana zaba ti yandi kele

kieleka. Beno fwana zaba ti yandi keke dyabulu. Mpe, na ntangu mosi yina beno—beno ke zaba yandi, mpe beno zaba ti yandi keke dyabulu mpe yandi ke telemina beno, kuna, samu na kununga, beno fwana zaba ti Nzambi yina keke na kati ya beno keke nene mingi mpe ngolo mingi kulutila yina yandi keke, ti Yandi yina keke na kati ya beno kunungaka yandi yimeni. Mpe, na lemvo ya Yandi, beno keke na ntela ya kulutila na kutelemina yandi. Amen. Beno tala lunungu ya kieleka, ntangu beno ke zaba yawu.

¹⁰⁶ Beno ke tala na manima, ke tuba, “Mu ke na kusalaka *yayi* mpe mu ke na kusalaka *yina*,” na yina kuna, ve, beno—beno, ba me nunga beno.

“Kasi ya keke ve na kitumbu na bayina keke na kati ya Klisto Yesu, bayina ke tambulaka ve landila nsuni, kasi landila Mpeve.” Kuna beno zaba ti beno me nunga.

Mpe beno zaba ti yandi keke dyabulu.

Beno lenda tuba ve, “Mu keke na kimbevo, mpe mu—mu—mu—mu—mu ke kwikila ve ti ya keke kimbevo.”

Oh, yinga, ya *keke* kimbevo.

Beno keke na cancer, beno “ke kwikila ve ti ya keke cancer.”

Ya *keke* cancer. Ya *keke* cancer.

Kasi, beno bambuka moyo, “Yandi yina keke na kati ya beno keke nene mingi kulutila yandi yina keke na yinza.” Beno fwana zaba ti Mpeve-Santu yina keke na kati ya beno nungaka yimeni kima yayi. Mpe Yandi keke na kati ya beno, mpe beno lenda nunga na nzila ya Yandi. Ya keke kaka ya kulunga, ya keke kaka mutindu ya kusonama na Masonuku. Kununga!

Mu fwana sala nswalu. Mu me baka yimeni baminuti makumi yiya na tanu ntangu yayi. Kieleka mu ke na kuluta nunga ntangu yayi.

¹⁰⁷ Beno tala, kununga! Nzambi yina keke na kati ya beno keke nene mingi kulutila yandi yina keke na kati ya yandi. Nzambi ya yinza keke ve nene mutindu Nzambi ya Mazulu, yina keke na kati ya beno, mutindu mosi mpimpa lenda telama ve na ntwala ya nsemo.

¹⁰⁸ Ntangu yayi, mpimpa lenda ve kutelama na ntwala ya nsemo. Mu ke kipe ve mutindu mpimpa ya keke, nsemo ke basisa yawu. Ya lenda telama ve. Nkembo! Kasi beno baka mpimpa nyonso yina beno zola, mpe beno meka na kutelemina mbala mosi nsemo, beno mona yina ke salama.

Ya keke Yina keke na kati ya beno, ya keke Nsemo. Mpe yina keke na yinza keke mpimpa. Na yawu, Nsemo me monisa ke nunga mpimpa, mutindu mosi muntu yina keke na kati ya Klisto mpe zaba ti yandi me nunga bima ya yinza. Amen. Ya keke dyaka ve ya kukangama na beno, ata fyoti. Beno keke na kimpwanza. “Beno tambula na kati ya Nsemo, mutindu Yandi keke na kati ya Nsemo,

mpe Menga ya Yesu Klisto ke sukula beto na disumu nyonso, mpe beto ke bundana mosi na yankaka.” Yawu yina.

¹⁰⁹ “Yandi yina kele na kati ya beno kele nene mingi kulutila yina kele na yinza.” Ntangu yayi, kana beno tala na manima mpe beno tala kubedisa, kuna beno kele dyaka na yinza. Kasi kana beno ke na kuzingila na zulu ya yawu, kuna Yandi yina kele na kati ya beno me nata beno na zulu ya mpimpa.

Mutindu lis, yandi kele na zulu ya mpimpa ya poto-poto. Yandi kele na zulu ya bamaza ya poto-poto. Yandi kele na kati ya nsemo, na kutalisaka kitoko yina ba tulaka na kati ya yandi ntete yandi katuka poto-poto. Amen.

¹¹⁰ Ntangu yayi mu—mu ke kumitala mutindu Muklisto ya kifuluka na miloolo. Yina Nzambi tulaka na kati kuna, na mbandukulu, yawu me sala nzila ya yawu, na kununga. Yawu me nunga mpusu. Yawu me nunga poto-poto. Yawu me nunga bamaza. Yawu me nunga nyonso, mpe vwandaka munungi, mpe vwandaka lakisa kitoko mpe Nkembo ya Nzambi.

¹¹¹ Ya kele mutindu konso mukwikidi ke salaka. Ya kele mutindu Noé kusalaka. Ya kele mutindu Lot kusalaka. Yawu yina mutindu. Beno tala mvindu na kati ya yina yandi vwandaka. Ya kele mutindu Moise kusalaka. Ya kele mutindu Josué kusalaka. Ya kele mutindu Daniel kusalaka. Ya kele mutindu Schadrac, Méschac kusalaka. Ya kele mutindu Jean Baptiste kusalaka; Zacharie, Élisabeth. Ya kele mutindu yina Siméon, ya kele mutindu yina Anne, mosi na mosi ya bawu kusalaka. Bawu kunungaka poto-poto yina vwandaka na ziunga ya bawu mpe na kati ya bawu. Bawu basisaka yintu ya bawu na zulu ya nyonso, mpe lezimaka Nkembo ya Nzambi. Yawu yina Muklisto ya kieleka ke salaka.

¹¹² Beno bambuka moyo, Yesu talisaka Yandi mutindu ya kusala. Bilumbu makumi yiya ya mpukumunu, ba mekaka Yandi kulutila muntu nyonso yina ba zolaka meka ntete, na mpukumunu ya Yesu Klisto. Beno tala mbote. Yandi lakisaka beto mutindu ya kusala.

Ntangu yayi mu ke sukisa, kaka na mwa ntangu fyoti.

¹¹³ Beno tala. Yandi lakisaka beto mutindu ya kusala. Wapi mutindu Yandi salaka yawu? Na nzila ya Ndinga. Ya kele mutindu Yandi salaka yawu, samu ti Yandi vwandaka Ndinga. Mpe Yesu tubaka, “Kana beno kangama na kati ya Munu, mpe Bandinga ya Munu na kati ya beno,” beno me vutuka dyaka na Ndinga, na Ndinga ya nsilulu. Yinki kele Ndinga ya nsilulu na konso Muklisto? “Yandi yina kele na kati ya beno kele nene kulutila yina kele na yinza.” Na yina wapi mutindu mu ke nunga? Munu ve, kasi Ndinga yina kele na kati ya munu. Ndinga kele Nzambi. Na yina mu ke nunga bima ya yinza, samu ti ya kele Ndinga na kati ya munu. “Kana beno kangama na kati ya Munu, Bandinga ya Munu na kati ya beno, kuna beno lomba yina beno

zola.” Beno landila kaka na kusala nzila na zulu. Beno ke kwiza na zulu, ya kieleka mutindu kima nyonso. Beno me mona? Beno fwana kwiza na zulu.

¹¹⁴ Bilumbu makumi yiya ya mpukumunu, na nzila ya Ndinga ya Nzambi Yandi nungaka. Mu zola tuba kima mosi awa kaka baminuti fyoti. Satana kusalaka mitindu tatu ya nene ya kunwanisa Yandi na mpukumunu yina. Beno tala mbote. Ya ke vwandaka ntangu nyonso na kati ya bawu tatu yina. Beno zimbana yawu ve. Beno me mona? Yandi salaka mitindu tatu ya nene ya kunwanisa, kubanda na ya kulutula zulu na ya kulutula yisi. Yandi salaka nyonso na kununga Yandi. Kasi Yandi vwandaka Ndinga. Amen. Yinki Yandi kusadilaka? Yandi mosi, Ndinga. Kunwana tatu ya nene to mitindu ya kunwanisa ya Satana na zulu ya Yandi, kasi Yandi teleminaka yandi na Ndinga. Konso kunwana, Yandi lendaka kunwanisa yawu na Ndinga. Beno tala mbote yayi ntangu yayi, kubanda na ya kulutula zulu na ya kulutula yisi.

¹¹⁵ Kunwana ya yandi ya ntete vwandaka, na kunata Yandi kusadila ngolo ya Yandi. Na yina, Yandi zabaka ti Yandi vwandaka Ndinga. Yandi zabaka ntelamanu ya Yandi. Beno ke kwikila ti Yandi zabaka? “Munu Mwana ya muntu.” Yandi zabaka ntelamanu ya Yandi. Mpe Satana kwizaka mpe zolaka ti Yandi kusadila ngolo ya Yandi Mosi na Yandi mosi, samu na kudikisa Yandi, samu na kudikisa Yandi Mosi. Yandi vwandaka na nzala. Muntu kele na nzala, yandi lenda sala kima nyonso. Yandi ke yiba, ke baka na ngolo, ke lomba, ke defa, nyonso. Beno me mona? Yandi vwandaka na nsatu yina. Mpe Satana kusadilaka mutindu ya yandi ya nene ya ntete na zulu ya Yandi, samu na kubaka ngolo ya Yandi yina ba pesaka Yandi samu na kununga mpe kusadila yawu na zulu ya Yandi mosi. Yandi kusadilaka yawu ve na zulu ya Yandi mosi. Ve. Yandi kusadilaka yawu na zulu ya bayankaka. Ya kele kieleka. Yandi kusadilaka yawu na zulu ya bayankaka, na Yandi mosi ve. Ya vwandaka ve samu na Yandi. Ata ti, Yandi vwandaka na lenda ya kusala yawu. Ya kieleka yandi zolaka sala yawu.

¹¹⁶ Kasi beno me mona mutindu dyabulu zola kusala? Dyabulu zola ti beno kuwa yandi. Yandi kuwaka kaka yina Tata tubaka na kusala. Ya kele kieleka.

Yandi tubaka, “Kasi,” Satana tubaka, “ya kele ya kusonama, ‘Yandi ke pesa muswa na Bawanzio . . .’”

¹¹⁷ Yandi tubaka, “Yinga, kasi ya kele ya kusonika mpe . . .” Beno me mona? Yawu yayi. Beno me mona? Yandi zabaka Nani Yandi vwandaka. Satana kusalaka . . .

Dibanza kele mudindu mingi kulutula na yina Yawu kele ya kusonika. Beno me mona? Ya kele dibanza ya kimpeve. Mukokolo kele na kati ya Yawu, beno me mona, yina Yawu kele ya kieleka.

118 Ata ti Yandi vwandaka na lenda ya kusala yawu, Yandi salaka yawu ve. Kasi Yandi—Yandi ata mbala mosi ve kukipeke dibanza ya Satana.

Ntangu yayi, awa kele kima ya mbote. Beno me mona? Ntangu yankaka Satana lenda baka beno, mpe na ntangu beno ke banza ti beno ke na kusalaka luzolo ya Nzambi, mpe lenda pesa beno dibanza, beno ke kubwa samu na yawu. Yinga, tata. Ya kieleka yandi lenda.

119 Ntangu yayi beto baka kaka, na kutala, mutindu bampangi ya beto ya bakento. Ba kele kitoko. Mpe yandi lenda nata beno na kisika, ti, beno ke bika nsuki ya beno kukula, beno zabaka ve ya ke talana mbote mingi na zulu ya beno, mpe, kima ya ntete beno zaba, beno ke kuzwa mwa sensasyo mutindu beno me lunga, na kutala ti beno kele na mwa zulu. Bayankaka ya beno babakala, beno zaba yina mu zola kutuba. Beno me mona? Mpe yandi lenda baka kima mosi mpe kupesa beno yawu mutindu dibanza. Ya kele kieleka. Beno me mona. Beno fwana kununga yawu.

Beno bambuka kaka moyo, beno ke na kuzinga samu na Nzambi. Beno kele na kikuma mosi, mpe yina kele Yesu Klisto. Na ngaanda ya yawu, kima yankaka kele ve. Ya kele Yandi. Mpe, ya zole, samu na dibuta ya beno. Mpe, ya tatu, samu na beno mosi. Kasi, ya ntete, samu na Nzambi; yina ke landa, samu na dibuta ya beno; mpe na manima, samu na beno. Beno kele numelo ya tatu; yina kele nsuka ya nzila. Beno vwanda ya nsuka; Yandi salaka yawu.

120 Beno tala yina Yandi zolaka sala. Yandi tubaka, “Mu lendaka bokila Tata ya Munu, kuzonza na Yandi, Yandi zolaka fidisa Munu na nswalu bankonga kumi na zole ya Bawanzio.” Na yina, mosi ya Bawu zolaka bebisa yinza. Yandi tubaka, “Kana Kimfumu ya Munu vwandaka na yinza yayi, na yina bantu ya Munu zolaka nwana. Kasi Kimfumu ya Munu kele ya Zulu.” Yawu yayi. Beno me mona? Yandi zolaka sala yawu, kasi Yandi salaka yawu ve. Beno me mona? Ata ti, Yandi vwandaka na lenda ya kusala yawu. Yandi kuwaka ata mbala mosi ve dibanza ya Satana.

121 Ntangu yayi, beno me kuwaka bantu kutuba, “Kana—kana beno ke kwikila ti ya—ya kele na munganga ya Nzambi. . . Kana beno kele munganga ya Nzambi. . . Beno kwenda bokila munganga ya beno ya Nzambi. Mu kele na muntu awa, ke na kubela. Mu ke zola kumona yandi kubelusa yandi.” Beno me mona dyabulu mosi yina? Yandi ke na kumeka na kupesa beno dibanza. Yandi ke na kumeka na kunata beno na kuwa yandi na kisika ya Nzambi. Kasi kisadi ya kieleka, ya kieleka ya Nzambi ke kuwa mpe ke mona yina Tata ke tuba, ntete. Beno me mona?

122 Mutindu mwa bebe ya Stadskev, ntangu ba fidisaka bawu awa. Mpe Mama Stadskev tubaka, “Mpangi Branham, mu ke bokila na Allemagne.” Ya vwandaka na mosi ya bampepo ya

reaction ya bawu ya basoda ya Amerika, yina vwandaka awa na bilanga, yina zolaka nata munu na Allemagne mpe kuvutula munu, na kilumbu yango. Yandi vwandaka kisyelo. Mpe bebe yina vwandaka ya kutandama, ya kufwa. Mpe mwa mama yina bokaka, yandi tubaka, “Benó kuwa!” Yandi tubaka, “Mu zaba. Mu vwandaka kaka kuna mpe mu monaka kento yina kusimba bebe yina ya kufwa na maboko ya yandi, yina kufwaka na suka yina. Mu monaka Mpangi Branham kubelama kaka kuna, kutentika maboko na zulu ya bebe yina ya kufwa, mpe yandi vutukaka na luzingu.” Yandi tubaka, “Yayi kele bebe ya munu, Mpangi Branham.” Ya vwandaka ntete ve na lufwa na dibuta ya bawu. Benó me mona? Mpe mwa kima yayi kuzwaka kimbevo na suka mosi mpe kufwaka na manima ya midi yina.

Awa vwandaka bawu nyonso ya kutelama na ziunga, mpe vwandaka pesa bapofesi mpe nyonso, “Bebe ke vumbuka,” mpe nyonso mutindu yina.

¹²³ Mu tubaka, “Mbote, yina kele mbote mingi, Mpangi-kento Stadskev. Kasi bika mu tala yina Tata ke tuba.”

Mu kwendaka na mfinda. Mpe mu sambilaka. Mu vutukaka; yandi bokilaka bambala zole to tatu ntete mu vutuka na suka yina landaka. Ata kima.

Dokotolo tubaka, “Mbote mingi.” Yandi tubaka, “Kana ya kele yina, kana nge kele na lukwikilu mutindu yina, mama, beto ke bika ve bebe yayi kubasika na lupitalu. Bika yandi kulala kaka awa. Nge vwanda kaka awa na yandi. Ya kele ya kulunga.”

Mpangi Stadskev kwendaka mpe monaka mfumu ya basoda. Bawu tubaka, “Ya kieleka. Beto lenda nata yandi kuna na mpepo, mpe kuvutula yandi dyaka.”

¹²⁴ Mpe ya vwandaka na mpepo kuna, vwandaka vingila, samu na kunata munu kuna na suka yina mpe kuvutula munu dyaka na mpimpa yina, na Allemagne, na Heidelberg na Allemagne, samu mvumbukulu ya mwana yayi. Mu tubaka, “Ya kieleka, Nzambi lenda sala yawu, kasi beto tala yina kele luzolo ya Yandi.”

¹²⁵ Na yina mu kwendaka, sambila mpimpa ya muvimba. Kima ve kusalamaka. Mu vutukaka na suka yina landaka; kima ve kusalamaka. Mpe na yina mu bandaka na kukota na kivinga. Kaka kuna na ntangu mu talaka, mpe kuna kutelamaka Nsemo yina na zulu ya kyelo. Yandi tubaka, “Kutula diboko ya nge na zulu ya yandi ve. Kusemba yawu ve. Ya kele diboko ya Nzambi.”

¹²⁶ Mu bokilaka yandi na alo-alo. Mu tubaka, “Mpangi-kento Stadskev, beno zika bebe ya beno. Ya kele diboko ya Mfumu. Ya kele luzolo ya Nzambi. Kima zolaka salama na ntuala na luzingu ya bebe yina. Benó bika kaka yandi kukwenda kisika yina Nzambi zaba kisika yandi kele. Kuna benó lendaka kwenda na kisika yandi kele. Kana yandi kuzinga, benó ke lenda ve. Benó bika kaka yawu mutindu yina.”

¹²⁷ Mulongi yina ya nene ya Lutherien na Allemagne kusonikaka mukanda mpe tubaka, “Mutindu mu ke sepela, na yina, Mpangi Branham kuingilaka na lukanu yina ya kieleka ya Nzambi, ntete yandi kutuba kima mosi.”

Yawu yina. Beno kangama na lukanu ya Nzambi. Ata yina bayankaka ke tuba, to nyonso yina ya kele, beno kuwa dibanza ya Satana ve, ata fyoti.

¹²⁸ Kana Satana tuba, “Ntangu yayi, mbotika ya maza, na nkumbu ya ‘Tata, Mwana . . .’” Kana ti, yandi pesa dibanza, beno bika yawu. Nzambi tubaka mutindu yankaka. Kana yandi tuba, “Nge kele muntu ya mbote, nge fwana vwanda ve . . . Nge kele kento ya mbote, nge fwana sala ve . . .” Beno kuwa dibanza yina ve. Kana Ndinga ke tuba kima ya kuswaswana, beno vwanda na Ndinga ata nyonso yina yawu kele. Ya kele kifwanusu Yesu pesaka beno, mpe ya kele mutindu yina ya nene ya kunwanisa, beno me mona, yina yandi salaka na zulu ya Yandi.

¹²⁹ Mpe, mutindu ya zole ya kunwanisa. Mu ke sala nswalu. Ya ke talana kaka ti ngunga me kwenda mingi na nswalu. Mutindu yankaka ya nene ya kunwanisa vwandaka, yina yandi tulaka na zulu ya Yandi, ti Yandi ke vwanda na matalana.

Mpe mutindu ya ke kumaka na bisadi ya Nzambi, kuvwanda na matalana, samu na kulakisa yina beno lenda sala. “Nkembo na Nzambi! Aleluya! Mu kele mvulusi! Mu kele *yayi*.” Beno me mona? Beno me mona?

¹³⁰ “Mata awa, na zulu ya tempelo, mpe vwanda awa.” Yandi mekaka Yandi na kusala yawu. Ntangu yayi, beno bambuka moyo, ba mekaka Yandi na kusala yawu, mpasi. Yandi tubaka, “Ntangu yayi, kana Nge zola vwanda kima na ntuala ya bantu, telema awa na zulu ya tempelo yayi, kubwa.” Beno me mona? “Mu ke pesa Nge Masonuku samu na yawu, samu ti ya kele ya kusonama, ‘Yandi ke pesa muswa na Bawanzio na zulu ya Nge, na boma ti, na ntangu mosi, dikulu kututa ditadi. Yandi ke nata Nge.’” Samu na kunata Yandi na kusala matalana, samu na kulakisa lutumu ya Yandi.

¹³¹ Ata kisadi ya kieleka ya Nzambi ke salaka yawu. Ntangu beno ke mona muntu kusala matalana, kubula ntulu ya yandi, mpe nyonso mutindu yina, beno bambuka kaka moyo, ya kele na kima ya yimbi kuna. Ve. Nzambi zola yawu ve. Yesu lakisaka mutindu. Yandi zolaka sala yawu. Ya kieleka yandi zolaka sala yawu, kasi Yandi salaka yawu ve. Ata kisadi ya Nzambi kele na matalana, na yandi mosi, samu na kumeka na kubaka lutumu ya Nzambi mpe kulakisa yandi mosi na zulu ya muntu yankaka.

¹³² Beno ke bambuka moyo ti Moise kusalaka yawu? Beno ke bambuka moyo na yawu? Nzambi pesaka yandi lutumu ya kusala nyonso yina yandi zolaka; salaka yandi profete. Yandi kulumukaka kuna na Ditadi yina, mpe yandi bulaka Ditadi bambala zole. Yina vwandaka telemina luzolo ya Nzambi.

Nzambi tubaka, “Zonza na Ditadi yina. Kubula dyaka yawu ve. Nge ke bebisa nyonso—nyonso ya kifwanukusu awa. Ditadi ke bulama kaka mbala mosi.” Kasi yandi zonzaka na kulemba ya Ndinga na ntangu yandi salaka yawu; Yina vwandaka ve ya kulunga. Yinga. Ndinga vwandaka yina vwandaka salama. Ditadi yina vwandaka Ndinga. Beno me mona?

¹³³ Yandi, na mbala ya ntete, yandi bulaka Ditadi mpe bamaza kubasikaka. Mpe kuna bawu kuzwaka dyaka nsatu ya maza. Yandi tubaka, “Ntangu yayi vutuka mpe tuba na Ditadi.” Ba bulaka kaka yawu mbala mosi. Beno me mona?

“Kukondwa ya Ndinga,” Moise kusiamisaka na yawu. “Ndinga vwandaka ya kieleka ve; Yandi zolaka bula dyaka yawu.”

¹³⁴ Na yina Moise kwendaka kuna mpe bulaka Ditadi mutindu yina, yandi tubaka, “Basika!” Ya basikaka ve, na yawu yandi bulaka dyaka yawu, mpe tubaka, “Basika! Mu ke tuma nge na kubasika.” Mpe bamaza kubasikaka.

¹³⁵ Nzambi tubaka, “Mata awa. Kwiza awa. Nge me kembisa nge mosi. Nge me baka lutumu ya Munu; na kisika ya kusantisa Munu, nge me santisa nge mosi. Na yawu nge ke kota ve na yinsi. Tala, mona mutindu ya kele kuna; kasi, awa, nge ke katuka kaka awa.” Oh, la la! Ya me vwandaka ntete ve na mosi mutindu Moise, beno zaba. Ve, ve.

¹³⁶ Ntangu yandi kwizaka kuna na matalana yina na Yesu, yandi tubaka, “Mata na tempelo awa mpe kubwa.”

¹³⁷ Yandi tubaka, “Ya kele ya kusonama,” amen, “Kumeka ve Mfumu Nzambi ya nge.” Beno me mona? Yandi vutulaka yandi na Ndinga, na yina, mpe na konso mutindu ya nene ya kunwanisa.

¹³⁸ Ata kisadi ya kieleka ke meka na kukilakisa yandi mosi, na—na lutumu ya Nzambi. Kana yandi sala yawu, yandi ke zimbisa kaka kuna.

¹³⁹ Mutindu ya tatu ya nene ya kunwanisa, Satana kanisaka na kupesa kimfumu yayi na Yandi. Yandi salaka yawu. Satana tubaka, “Nge ke mona bimfumu yayi ya yinza? Yayi kele ya munu. Mu ke sala na yawu nyonso yina mu zola kusala. Mu ke pesa yawu na Nge.”

Kasi, beno ke bambuka moyo, yandi vwanda meka na kunata Yandi na kubika yawu kukondwa kulunsi. Kana Yandi salaka yawu, beto zolaka zimbana. Yandi zolaka baka kimfumu. Kasi Yandi zolaka landa. . . Yandi zolaka vutuka. Ba mekaka Yandi na kusala yawu, ntangu yayi. Lufwa kele kima mosi ya mpasi. Ba mekaka Yandi na kuzwa kimpwanza ya Yandi mpe kuvwanda Ntinu ya ntoto, kukondwa kulunsi. Kasi, kana Yandi salaka yawu, bantu ya Yandi zolaka kufwa. Satana zolaka sepela na

kupesa dibanza yina na Yandi. Kasi Yandi tubaka, “Kwenda na manima ya Munu, Satana.” Yandi salaka yawu ve.

¹⁴⁰ Yandi kwizaka mpe talaka mpasi, mpe bakaka nzila ya mpasi, ya ngolo. Yandi bakaka nzila ya nkwasusu. Yandi bakaka nzila ya lufwa.

Beto, na suka yayi, zola kusala, na kubaka nzila mosi yina Yandi bakaka? Beto ke zola kufwa? Beto zola kukipesa beto mosi na Nzambi, kubika yinza nyonso mpe nyonso, samu na kusadila Yandi? Beno me mona?

¹⁴¹ Ntangu yayi, Yandi salaka yawu ve. Yandi zolaka ku—kupesa yawu, Satana zolaka, na Yandi. Kasi Yandi salaka yawu ve. Ata ti ba mekaka Yesu, Yandi nungaka samu na beto. Yandi—Yandi nataka bampukumunu nyonso samu na munu mpe samu na beno. Beno me mona? Yandi zolaka baka kaka yawu kuna. Kasi samu na yinki Yandi bakaka nzila yankaka? Samu ti beto lenda kwiza, kuvwanda na Yandi. Mpe kana Yandi futaka ntalu ya mutindu yina, na yina wapi mutindu fyoti beto ke vwanda na kubaka yawu ve? Na yina, beno bambuka moyo, ya kele na kima ve awa, na mutindu nyonso.

¹⁴² Kana beno zinga bamvula nkama, wapi kisika beno ke kuma? Dibanza, mpe mpeve ya beno me kwenda, nyonso me lemba, mpe kiboba mpe ke tekita. Ya kele kisika beno ke na kwenda, mpe yina kele nsuka ya yawu. Beno kwiza ntangu yayi, kununga nyonso. Wapi mutindu beno ke sala yawu? Na nzila ya Ndinga. Yina Ndinga ke tuba, beno sala yawu. Beno tambula ya kukuluka. Beno zinga na mvwandulu ya Yesu.

¹⁴³ Yandi nataka bima nyonso samu na beno na munu. Yandi kele kifwanusu ya beto na mutindu ya kununga nsungi ya beto ya yimbi, mutindu Yandi kunungaka nsungi ya Yandi ya yimbi.

¹⁴⁴ Beno bambuka moyo, ntangu Yandi kwizaka na ntoto, ya vwanaka kaka na kukondwa lukwikilu mingi, to ya kulutula, ti ya kele na ntangu nyonso yankaka. Ya kwamisaka Yandi ata fyoti ve. Ntangu ba bokilaka Yandi dyabulu na kisika ya Nzambi, ntangu ba bokilaka Yandi bima nyonso yina lendaka salama, ya kwamisaka Yandi ata fyoti ve. Yandi vwanaka na lukanu mosi: “Kuwa Tata. Kuzitisa Ndinga.” Ndinga kele Nzambi. Yandi vwanaka na dibanza mosi.

¹⁴⁵ Beto bantangu mingi kele ya kumekama na kuvutuka. Mingi ya beno, kele ya kumekama na kuvutuka na denomination, na kuvutuka mpe kubaka yawu, samu ti yinza nyonso ke tuba, “Na wapi denomination nge kele? Na wapi dibuundu nge kele ya kuvukana?” Beto kele ya kumekama na kusala yawu; beto nyonso kele. Bampangi ya beto ya bakento kele ya kumekama na kuvutuka, na kuvutuka mpe kukuma ya mwa mabuundu yankaka, na bayankaka ya ba-Assemblée, to mabuundu ya Nzambi, to mosi ya bawu; mpe kuvwanda Pentecotiste, kubika bansuki ya beno ya kuzenga, mpe kulwata kaka na kutala

mutindu nyonso beno zola. Beno me mona? Beno kele ya kumekama na kusala yawu, na kuvutuka mpe kuvwanda ya kuzabana na nsungi yayi ya yimbi na kati ya yina beto ke na kuzingila.

Na yina, yayi kele disumu ya nene ya bilumbu ya beto. Ya kele disumu ya nene na kati ya bantu ya beto, nkadulu ya yinza, mutindu Biblia ke tuba Lawodi- . . . yina Nsungi ya Laodicée vwandaka. Yandi kele na nkadulu ya yinza, “Mvwama, kele na nsatu ya kima ve; zaba ve ti yandi kele kinkonga, na mpasi, na mawa, mpe mpofu.” Yina kele disumu ya kilumbu ya beto. Na ntangu beno ke kuwa Ndinga ya Nzambi kutelemina yawu, mpe beno ke baka nzila yina yankaka, ba ke tala beno yimbi na yinza. Beno kele ya kumekama na kuvutuka.

¹⁴⁶ Mu zaba. Beno ke landilaka na kutuba na munu. Mu zaba ti beno ke tubaka, “Ntangu nyonso.” Mu zaba ti beno me lembaka na kuwa munu kuvutukila bima yayi. Mu me lembaka mpe, na kumona beno kusala yawu, ya kele kieleka, disumu yayi yina mu ke na kumeka na kutuba na beno. Beno tuba, “Samu na yinki nge ke vutukilaka na yawu?” Na yina, beno sukisa na kusala yawu. Mu ke na kumeka na kuvuukisa luzingu ya beno, na nzila ya Ndinga. Mu ke lembaka, mpe. Na yawu, beno sungama. Yayi kele disumu, ya zolaka salama ve. Yinga, tata.

¹⁴⁷ Beto fwana nunga bima yayi. Beto fwana kuingila na kumekama na nzila ya bawu, yinza. “Kana beno zola yinza, bima ya yinza, zola ya Nzambi kele ve na kati ya beno,” tubaka Yesu.

¹⁴⁸ Ntangu yayi beto ke sukisa kaka, mpe ke tuba yayi. Ya kele na musendo samu na kinungi.

¹⁴⁹ Beno bika mu tanga kima awa samu na beno. Beno baka Babiblia ya beno. Beto vutuka na Apocalypse, kapu ya 3, ya 2. Beno tala mbote awa ntangu yayi, bima nyonso yayi yina mu ke na kuzonzilaka, na kununga. Ntangu yayi beno kukitala kaka beno mosi mpe beno mona. Beno kukitala beno mosi na kitatala ya kimpeve, beno tala kana beno me nunga.

¹⁵⁰ Ntangu yayi, nsangu ya ntete, na—na wanzio ya Éphèse, mu zola beno kuwa yina Yandi kutubaka. Mpe Apocalypse, kapu ya 2, nzila ya 7. Yayi kele samu na nsungi ya dibuundu yina, na ntangu Yandi tubaka na bawu nyonso yina bawu kusalaka, “Kubikaka luzolo ya bawu ya ntete.” nzila ya 7:

Yandi yina kele na dikutu, ti yandi kuwa yina Mpeve ke tuba na mabuundu; Na yandi (na muntu yina, na dibuundu ve) . . . Na yandi yina ke nunga—nunga Mu ke pesa ya kudya na yinti ya luzingu, yina kele na kati-kati ya paladiso ya Nzambi.

Beno me mona? Minungi ya Ephèse.

¹⁵¹ Ntangu yayi, yina ke landa vwandaka Smyrne. Ntangu yayi, na minungi ya yawu, beto ke kuwa yayi. Ntangu yayi, nzila ya 11.

Na yandi—yandi yina kele na dikutu, ti yandi kuwa yina Mpeve ke tuba na mabuundu; Yandi yina ke nunga ke tala ve mpasi ya lufwa ya zole.

Beno me mona? Bawu nungaka yawu.

¹⁵² Ntangu yayi, ti, awa beto tala na Pergame, beto ke tala yina ba bumbaka samu na yandi munungi, awa. Beto ke tanga nzila ya 17, na dibuundu ya Pergame.

Yandi yina kele na dikutu, . . .

Yina, ya kele muntu mosi, kimvuka ya muvimba ve. Muntu mosi, yina kele Kento ya makwela ke basika, beno me mona, Dibundu.

Ti yandi yina kele na dikutu, kuwa yina Mpeve ke tuba na mabuundu; Na yandi yina ke nunga Mu ke pesa ya kudya mani ya kubumbama, mpe ke pesa yandi ditadi ya mpembe, mpe na ditadi nkumbu ya malu-malu kele ya kusonama, yina muntu ve zaba kana kaka yandi yina me kuzwa yawu.

Yina kele samu na munungi, ya nsungi ya dibuundu.

¹⁵³ Ntangu yayi, yina ke landa kele Thyatire. Beto tala yina munungi kuzwaka na kilumbu yina. Beto baka nzila ya 26.

Mpe yandi yina ke nunga, mpe ke bumba bisalu ya munu tii nsuka, na yandi mu ke pesa ngolo ya kuyala bayinsi: (Ya kele kieleka.)

Mpe . . . ke yala bawu na nkawa ya kisengo; mpe mutindu mbungu ya ntoto bawu ke pasuka na kati ya bandambu: mpe mutindu mu kuzwaka ya Tata ya munu.

Beno me mona, “Na Yandi, na kiti ya Yandi ya kimfumu.” Klisto ke yala bayinsi, na nkawa ya kisengo. Mpe awa kele Dibundu yina me kununga, “Ya kuvwanda kuna, na Yandi, samu na kubuka bayinsi na nkawa ya kisengo.”

¹⁵⁴ Ntangu yayi beto baka bayina na dibuundu ya Sardes. Ntangu yayi nzila ya 5 ya kapu ya 3.

Yandi yina ke nunga, mutindu mosi ke vwanda ya kulwata na bilele ya mpembe; mpe mu ke katula ve nkumbu ya yandi na buku ya luzingu, kasi mu ke tuba nkumbu ya yandi na ntuala ya Tata ya munu, mpe bawanzio santu.

Yina kele samu na munungi na Sardes.

¹⁵⁵ Ntangu yayi, beto baka ntangu yayi nzila ya 12. Awa, yayi kele samu na dibuundu ya—ya Philadelphie, na nzila ya 12.

Yandi yina ke nunga mu ke sala yandi dikunzi na tempelo ya Nzambi ya munu, mpe yandi ke kwenda dyaka ve na ngaanda: mpe mu ke sonika na zulu ya yandi nkumbu ya munu, nkumbu ya Nzambi ya munu, mpe nkumbu ya mbanza ya Nzambi ya munu, yina kele

Jérusalem ya malu-malu, yina ke kulumuka na mazulu na kukatukaka na . . . Nzambi: mpe mu ke sonika na zulu ya yandi nkumbu ya munu ya malu-malu.

156 Beno tala mbote yina ba silaka na munungi. Beno me mona?

Ntangu yayi, awa Laodicée, ya kele nsungi ya dibuundu ya nsuka. Ya ke vwanda na munungi na kati kuna. Beno tala mbote awa. Bawu, beno bambuka moyo, konso nsungi ya dibuundu, nsungi yina vwandaka landa yawu vwandaka kuzwa difwa nyonso yina kupesamaka na bayankaka. Beno tala mbote awa. Ntangu yayi, awa, ya kele na manima bawu me kuzwa bangolo nyonso yayi, bankumbu ya malu-malu yayi, mpe nyonso ya kusonama, yina Yandi silaka, mpe kudyaka mani ya kubumbama, mpe nyonso yina. Beno tala mbote nsungi ya dibuundu yayi ya nsuka, Apocalypse 3:21.

Na yandi yina ke nunga mu ke pesa yandi muswa ya kuvwanda na munu na kiti ya munu ya kimfumu, (amen), mpe mutindu munu mpe kununga, mpe kele ya kuvwanda na Tata ya munu na kiti ya yandi ya kimfumu.

Yandi yina kele na dikutu, ti yandi kuwa yina Mpeve me tuba na mabuundu.

157 Ya kele na musendo samu na munungi. Landila na kusala nzila, lis. Kana ya kele na kati ya beno, beno bika poto-poto mpe nyonso yankaka, mpe beno sala nzila tii na zulu. Yinga, tata. “Kuvwanda na Munu na kiti ya kimfumu ya Munu.”

158 Beno zaba, kilumbu mosi, mama ya Jacques na ya Jean. . . Beto ke kuzwa ve ntangu ya kutanga yawu. Mama ya Jacques na ya Jean kwizaka mpe lombaka kisika yayi. Beno zaba yawu? Beno ke bambuka moyo na yawu? “Mfumumu, ti mwana ya munu ya bakala kuvwanda na lweka mosi, mpe mwana ya munu yankaka ya bakala kuvwanda na lweka yankaka.” Yawu yina nsatu ya mama samu na mwana ya yandi.

Kasi beno tala mbote. Kasi, “Kisika yina,” Yesu tubaka, “yina ba soolaka ntete.” Kisika yayi vwandaka ve na luzingu na ntangu yina. Samu na yinki? Beno tala. “Ya ke pesama na bawu yina ya kubamaka.” Yinki? Muntu yina ke vwanda na diboko ya kibakala, mpe yankaka pene-pene ya Yandi, zolaka vwanda dyaka munungi. Beno me mona? Ya vwandaka dyaka. . . Yandi tubaka, “Mu—mu ke pesa yayi ve. Mu lenda pesa yayi ve, kasi ya ke pesama na manima kumekama me kwiza.” Amen. Beno me mona? “Mu lenda pesa yayi ve. Kasi na manima kumekama me kwiza, ba ke vwanda na diboko ya kibakala mpe na diboko ya kikento. Ya kele na nkuna yina ba soolaka ntete ke na kuingila kuna samu na yawu. Ya ke pesama na bayina ya silamaka. Ba ke pesa yawu kuna, kasi kumekama me salama ntete ve; ti, yandi me nunga ntete ve.” Beno me mona?

159 Muntu yina zolaka baka kisika yayi na lweka mosi, mpe mosi yankaka samu na kubaka yawu na lweka yankaka, pene-pene ya Yandi na Kimfumu, ya pesamaka ntete ve, beno me mona, ya kunungamaka ntete ve. Kumekama kubwaka ntete ve. “Ya ke kubwa na bilumbu ya ntwala.”

“Kana beto ke tala mpasi samu na Klisto mpe Ndinga ya Yandi, beto ke yala na Yandi, samu ti Yandi kele Ndinga.” Beno bambuka moyo, “Kana beto tala mpasi samu na Yandi mpe Ndinga ya Yandi, beto ke yala na Yandi, na Ndinga ya Yandi.”

160 Beno tala. Yandi, Kifwanusu ya beto, kunungaka, mpe na manima mataka, na manima Yandi nungaka lufwa, difelo, kimbevo, ntoni. Bima nyonso, Yandi nungaka. “Na manima Yandi mataka, mpe nataka bampika, pesaka makabu na bantu.” Yina vwandaka Ngwisani ya Ntama, na basantu ya Ngwisani ya Ntama yina nungaka. Bawu vingilaka Muntu yina, mpe bawu kufwaka ntete ti Yandi kwiza. Kasi ntangu Muntu yayi kwizaka, “Ba vwandaka ve na mantwala ya bawu bayina vwandaka ya kulala.” Amen. Ya lenda zimbanu ve, na mutindu nyonso. Kuzinga to kufwa, wapi luswaswanu ya ke sala? “Ke vwanu ve na mantwala.” Beno me mona? Ba vwandaka vingila yawu.

161 Mpe Job kuna na bilumbu yina, yandi vingilaka yawu. Yandi tubaka, “Mu zaba ti Mukudi ya munu kele moyo, mpe na bilumbu ya nsuka Yandi ke telama na zulu ya ntoto.” Ya vwandaka muntu ya kudedama, muntu ya kulunga. Yandi vwanu pesaka munkayulu. Yandi salaka nyonso yina Nzambi tubaka na yandi na kusala. Yandi salaka yawu na kuzitisa mpe buzitu. Yandi vwanu profete. Mpe kuna Satana kwizaka, samu na kumeka yandi. (Kaka mutindu yandi ke kwizaka na kumeka beno.) Yinki yandi salaka? Yandi landilaka na kutelema kuna.

Kento ya yandi basika, tubaka mpe, “Samu na yinki nge lenda ve kusinga Nzambi mpe kufwa? Nge ke talana muntu ya mawa na kuvwandaka kuna.”

162 Yandi tubaka, “Nge ke zonga mutindu kento ya kilawu.” Ntangu yayi, yandi tubaka ve ti yandi vwanu kilawu, kasi yandi vwanu tuba mutindu mosi. Beno me mona? Yandi tubaka, “Nge ke zonga mutindu kento ya kilawu.” Yandi tubaka, “Mfumu me pesa, mpe Mfumu me baka; nkembo na Nkumbu ya Mfumu.” Yandi nungaka.

163 Yandi nungaka yina bamfinangani vwanu tuba. Yandi nungaka yina nyonso bamambele ya dibuundu, Bildad mpe bawu nyonso yina, vwanu tuba. Yandi nungaka évêque mpe yina yandi vwanu tuba. Yandi nungaka cardinal mpe yina yandi vwanu tuba. Yandi nungaka denomination, yina bawu vwanu tuba. Mpe yandi vwanu na kunungisama ya Ndinga. Amen. Ata ti, ya lombaka yandi bima nyonso yina yandi vwanu na yawu, ata mpe bana ya yandi. Yandi vwanu

kuna, vwandaka kalata bamputa ya yandi na kimenga, mpe dyaka yandi kunungaka. Mpe ntangu ngunga ya nene ya mpukumunu kumaka na nsuka, kuna matuti me katuka.

¹⁶⁴ Yandi talaka na kima nyonso yina vwandaka mbote. Yandi tubaka, “Yinti kele na kivuvu kana yawu kufwa; yawu ke zinga dyaka. Mpe nkuna ke kubwa na ntoto, yawu ke bola; yawu ke zinga dyaka. Kasi muntu ke lala mpe ke kufwa; yandi ke vwanda kuna. Mpe bana ya yandi ke kwiza, bana ya yandi ya babakala, samu na kuzitisa mpe kudila yandi; yandi ke zaba yawu ve. Yandi ke vumbuka dyaka ve. Oh, kuna yandi kele. Yinki kele dyambu? Mu kele nkuna, mpe. Mu kele kima, yina kele nkuna, mpe mu ke kwenda na ntoto. Mu ke lenda kutelema dyaka ve. Mu ke vwanda kuna. Oh, bumba munu na ntoni, bumba munu na kisika ya kinsweki tii nkele ya Nge ke luta. Pesa munu ntangu mpe fundisa munu. Mutindu matadi ya nene ke zimbanaka, maza ke bebisaka ditadi.” Oh, yandi landilaka, na kutubaka bima nyonso yayi. Yandi lendaka na kumona bifwanusu nyonso kuna, yina yawu vwandaka. Oh, yandi lendaka ve na kubakula yawu.

¹⁶⁵ Mpe, Mpangi-kento Rogers, nge ke bambuka moyo na ntangu mu longaka yawu na mafwa ya Busty. Beno me mona?

¹⁶⁶ Yandi tubaka, ti, “Matadi ke beba mutindu yina,” mutindu ya bima yina. “Oh, O Nge, bumba munu na kati ya ntoni, mpe bumba munu na kisika ya kinsweki.” Yandi landilaka na kusala nzila. Yandi tubaka, “Mu zola kuzaba. Mu zola kuzaba kisika mu lendaka kwenda, na Muntu yina lendaka tula maboko ya Yandi na zulu ya munu, muntu ya masumu, mpe Nzambi ya santu, mpe kuzonzila Yandi na munu.” Oh, la la! “Yandi kele Kuna. Mu zaba ti Yandi kele Kuna. Ya kele na Muntu Kuna yina lenda sala yawu. Ya kele na Muntu kisika mosi. Wapi kisika mu lenda kuzwa Muntu yina? Wapi kisika mu lenda kuzwa? Mu ke kwenda konkota na kyelo ya Yandi mpe kuzonza na Yandi. Kana Muntu lendaka tula kaka diboko ya Yandi na zulu ya munu, mpe na Nzambi, mpe—mpe kusala kyamvu samu na munu, kuzonza! Kana mu lendaka kaka kuzwa Muntu yina! Oh, wapi kisika Yandi kele?”

¹⁶⁷ Yandi sosaka na dibuundu ya yandi. Yandi sosaka na organisation ya yandi. Yandi lendaka ve kuzwa Muntu ya mutindu yina.

¹⁶⁸ Mpe na mbala mosi, matuti kukatukaka, mpe yandi monaka Muntu yina kukwiza. Oh! Ntima ya yandi ya kiboba bulaka na kyese. Na yina kima kusalamaka. “Mu zaba ti Mukudi ya munu kele moyo. Ya kele na Muntu ya mutindu yina.” Amen. Ya kele dyaka na Muntu ya mutindu yina. “Mu zaba ti Mukudi ya munu kele moyo. Mpe ata ti, na manima misobi ya mpusu kubebisa nzutu yayi, kasi na nzutu ya munu mu ke mona Nzambi, Yina mu ke mona samu na munu mosi. Yandi ke telama na zulu ya ntoto na kilumbu ya nsuka.”

¹⁶⁹ Na suka ya Paki yina, ntangu Yandi vumbukaka kuna, mpe nzutu ya Job vwandaka kaka lutu ya bombi, yandi vwandaka vingila. Yandi vwandaka Nkonga yina ya kusolama. Yandi vumbukaka na ntoni mpe kotaka na mbanza, na Abraham, Isaac, Jacob, Job. Oh, la la! Amen. Samu ti, bawu kuvingilaka Muntu ya mutindu yina.

¹⁷⁰ “Mpe na bayina ke na kuvingila Klisto na mbala ya zole,” bayina lenda nunga bima ya yinza yayi, na lemvo ya Yandi, samu na kukota na Yandi, mpe kukanga meso ya beno na kima yankaka kasi na Yandi mpe Ndinga ya Yandi, “Yandi ke monana na mbala zole na Nkembo.”

“Samu ti mpungi ya Nzambi ke wakana, bayina kufwaka kati na Klisto ke vumbuka; bayina kele ya moyo mpe ke vwanda ya kusoba, na ntangu mosi, na mbwetolo ya disu, ke bakama kintwadi, samu na kukutana na Yandi na zulu.”

¹⁷¹ Ata ti mu ke lutu ya bombi, to ata ti mu ke zinga na ntangu Yandi ke kwiza, yawu ke sala munu ata luswaswanu ve. Amen. Ya kele dyambu ve, samu ti mu me simba vision. Vwale me katuka, mpe mu ke mona Yandi. Muntu yina lenda telama, mpe kutula diboko ya Yandi na zulu ya munu, muntu ya masumu, mpe na zulu ya Nzambi ya santu. Mpe Yandi kele munkayulu ya munu. Yandi kele Ndinga yina mu ke baka ntelamanu. “Na mbandukulu vwandaka Ndinga.” Yandi kele Ndinga yina, mpe Yandi ke monikisa munu, Kuna. Amen. Mpe mu ke zonza yawu na ngolo, ntangu nyonso yina mu ke pema, “Yandi kele Mvumbukulu ya munu mpe Luzingu ya munu.” Mpe bisika nyonso yankaka kele zyelo ke dyamisa. Bisika nyonso yankaka kele zyelo ke dyamisa.

¹⁷² Mutindu Yandi bakaka bawu yina vwandaka vingila yawu, mutindu mosi Yandi ke kwiza na konso santu ya Ngwisani ya Malu-malu yina me nunga kutonga nyonso ya badenomination, bayina ke nunga masumu nyonso ya kuzabana ya bubu yayi, ya nsungi yayi yina beto ke na kuzingila bubu yayi, mutindu Yandi salaka na bansungi nyonso yankaka ya dibuundu, bawu yina nungaka na nsungi ya dibuundu yina. Bayina nungaka yinki? “Mu kele mvwama. Mu kele na nsatu ya kima ve. Mu kele. . . Oh, mu kele nyonso *yayi* mpe nyonso *yayi*. Mpe mu kele Kento ya makwela. Mu kele *yayi*. Mu kele na nsatu ya kima ve.’ Mpe zaba ve ti beno kele kinkonga, mpofu.”

¹⁷³ Beno me mona nsungi ya luvunu yina mu vwandaka tuba? Ya kele ve mutindu ya bayina ba zengaka bayintu ya bawu, ntama kuna, samu na kuzwa ditadi ya mpembe; ve bawu yina kufwaka na yisi ya bumartyr, mpe kuyokamaka na bankuni, mpe bima ya mutindu yina; bayina kuzwaka yimpu. Kasi ya kele nsungi yayi ya luvunu bubu yayi, yina ke banza ti bawu kele nyonso. “Mbote, mu kele mambele ya dibuundu. Mu kele muntu ya mbote. Mu

kele kento ya mbote. Mu ke salaka *yayi*. Mu kele na nsatu ya kusala *Yayi* ve.”

174 “Kasi yandi yina ke nunga,” yandi yina ke nunga bima nyonso yayi ya yinza ya nsungi yayi, yinki bawu ke sala? Bawu nyonso ke vwanda na Yandi na kiti ya Yandi ya kimfumu; ke kwenda na Enlevement ntangu Yandi ke kwiza. Oh, la la! Na yina, yinki mu ke kipe? Samu na yinki beto fwana kipe yina yinza ke tuba? Samu na yinki beto ke kipe yina muntu yankaka ke tuba? Mpeve-Santu ya nene kele na kati ya beto. Dikunzi ya Yandi ya Tiya ke na kutwadisa beto mpe ke na kunata beto. Ndinga ya Yandi me siamisama na ntuala ya beto. Zola ya Yandi kele na kati ya ntima ya beto. Yinza kele na manima. Beto me luta lufwa na Luzingu. Yinza ke banza ti beno me lawuka.

Kasi Yesu fwana nata kulunsi yayi Yandi mosi,
Mpe yinza ya muvimba kukipe ve?
Ya kele na kulunsi samu na muntu nyonso,
Mpe ya kele na kulunsi samu na munu.

175 Mu me kuna na bamvula makumi tatu na tatu na bilanga ya kumwangisa nsangu, mpe mu ke nata kulunsi yayi ya busantu tii lufwa ke pesa munu kimpwanza.

176 Ti bampangi ya munu kumanga munu, kutuba nyonso yina bawu zola, yina ke mangisa munu. Kasi na Ndinga *yayi* mu ke telama, mpe kaka na Yayi.

Kulunsi ya busantu yayi mu ke nata,
Tii lufwa ke pesa munu kimpwanza,
Mpe kuna kukwenda na Yinzo, na Enlevemnt,
na kulwata yimpu.

177 Yawu yina beto nyonso ke zola, mutindu yina ve? Yawu yina beto ke zola. Yina kele ya beto—kivuvu ya beto mpe lusambulu. Ata dibanza yankaka kele na beto, kasi yina kele na zulu ya Yesu Klisto. Mpe na zulu ya ludedomo ya Yandi beto ke telama, kaka, mpe ludedomo ya Yandi na kati ya Ndinga ya Yandi. “Mpe Ndinga kumaka nsuni mpe zingaka na kati-kati ya beto.” Mpe Ndinga ke na kusiamisaka Yawu mosi.

178 Kununga wapi mutindu? Na kubakaka Ndinga, nsilulu, na kukikulumusa, na kutambulaka ya kukikulumusa.

Kulunsi yayi ya busantu mu ke nata,
Tii lufwa ke pesa munu kimpwanza,
Kuna kukwenda na Yinzo, na kulwata yimpu.

179 Samu ti, “Ntangu Mpungi yina ke wakana!” Beno lenda zika munu na mubu, kasi Mpungi ke vumbula munu. Kieleka. Mu ke kwenda na Yinzo, kilumbu mosi. Amen. Tii kuna, mu ke nwana, amen, na kunataka kulunsi yayi; na kubikaka meso ya munu ve na zulu ya bantu, kasi kuna na Calvaire, samu ti Yandi vwandaka kifwanusu ya munu. Yandi lakisaka mutindu ya kusala yawu.

Mpe kifwanusu ya Yandi, beto ke sepela na kulandila yawu, kilumbu na manima ya kilumbu.

Mu ke na kulanda Yesu na konso kitambi ya nzila.

Mu ke na kulanda Yesu na konso kitambi ya nzila.

¹⁸⁰ Beno zola yawu ve? Oh, mutindu mu banza, kulanda Yandi, kilumbu na manima ya kilumbu, na konso kitambi ya nzila.

Beto sambila.

¹⁸¹ Mfumu Yesu, ngunga mosi mpe baminuti kumi na tanu ntangu yayi, mu me telama awa, na kumekaka na kunata Ndinga ya Nge mpe kubangula na bantu wapi mutindu ya kununga. Nge tubaka na beto mutindu ya kusala. Nge tubaka kaka na beto ve, kasi Nge lakisaka mutindu ya kusala. Nge twadisaka beto. Nge lakisaka beto mutindu ya kusala yawu: kuzwa Ndinga na kati ya beto, mpe kuvwanda ya kieleka ya kukangama na Ndinga yina, “Ya kele ya kusonama,” na konso mpukumunu; kasi kuvwanda ya kukikulumusa, kutambula ya kukikulumusa. Kuna beto ke nunga, na nzila ya Nge, na nzila ya ngolo ya Nge yina nungaka yimeni mbeni ya beto. Mpe kima kaka beto fwana sala kele—kele kutambula kaka ya kukikulumusa na lukwikilu, na kukwikilaka Yawu, mpe kidimbu ya kutalisa beto ya Mpeve-Santu, mpe Satana fwana kwenda.

¹⁸² Ya kele na bamuswale na zulu awa. Ya ke talisa bantu ya kubela. Ba kele bantu kele na nsatu, Mfumu. Mpe bawu ke tanga na Ndinga yayi yina ke kubwaka ve kisika ba vwandaka baka na nzutu ya Santu Paul bamuswale mpe bitende. Ba vwandaka tula yawu na zulu ya bantu ya kubela. Bampeve ya yimbi vwandaka basika na bawu, mpe bimangu ya nene kusalamaka. Ntangu yayi, Nge kele Mfumu Yesu mosi bubu yayi.

¹⁸³ Paul longaka Ndinga yayi, mpe sonikaka Ndinga yayi, Ndinga mosi yina beto ke na kumeka na kulanda. Samu ti, yandi bakaka Ngwisani ya Ntama mpe mutindu kifwanusu, mpe lakisaka ti ya vwandaka kifwanukusu, ti Ngwisani nyonso ya Ntama vwandaka kifwanukusu ya kulunga ya ya Malu-malu. O Mfumu, ti beto landa kifwanusu yina.

¹⁸⁴ Beto ke mona Mfumu ya beto, yina Yandi salaka. Mpe beto me bakula ti, basantu ya Ngwisani ya Ntama yina, na suka yayi, beto me tala ti bawu kwendaka. Ntangu Yesu vumbukaka, bawu kwendaka na Yandi. Mpe, Mfumu, beto ke kwikila ti beto ke kwenda na ntangu Yandi ke wakisa Mpungi. Beto ke kwikila yawu, ti Kento ya makwela ke kwenda na Kilumbu yina mpe ke vukana na nkonga ya ba-Hébreux ya Yawu, mpe, kintwadi, ya ke vwanda na Madya ya Makwela na Nkembo. Bawu ke na kuvingilaka.

Beto ke sambila ntangu yayi na kyadi mpe lemvo ya Nge na zulu ya beto. Minungi, Mfumu, minungi, beto zola kuvwanda.

Nunga beto. Mfumu Yesu, Nge nungaka yinza. Ntangu yayi mu ke sambila ti Nge ke sala muntu nyonso awa, na suka yayi, “Na kubika disumu nyonso, na kubika kizitu yina ke kangaka beto na pete, ti beto lendaka kima na ngemba na kukimaka mbangu yina kele na ntwala ya beto.”

¹⁸⁵ Paul zonzilaka yayi, Tata ya beto ya Mazulu, kuna na Buku ya Hébreux, ti, “Beto fwana bika kizitu nyonso,” ya kele na kapu ya 12, ti yandi zonzila yayi, na manima yandi me lakisa yimeni na nzila ya kifwanusu, na manima kuna: bawu yina tatamanaka; bawu yina tatamanaka ve; bawu yina landaka na mwa-tiya; bawu yina landaka na ntwala; bawu yina vwandaka tambula na manima. Nyonso, yandi lakisaka bifwanusu. Na manima yandi balukaka mpe tubaka, “Ti beto bika kizitu nyonso, mwa kima nyonso yina ke nyongisaka beto, ti beto lendaka kima na ngemba kukima ya mbangu yina kele na ntwala ya beto; na kutalaka na Yandi, Musoniki mpe Mumanisi ya Lukwikilu ya beto, Yandi yina pesaka beto kifwanusu.” Beto ke sala yawu na suka yayi, Tata.

¹⁸⁶ Ntangu yayi, na bayintu ya beto ya kukulumusa, ntangu yayi beno kukitala kieleka mbote, kieleka, kieleka mbote. Mpe, kuna, beno vwanda kieleka ya kieleka. Ya ke kaka—ya ke lomba kaka . . . Ya kele nyonso yina ya ke lomba: kukitala ya beno mpe bukieleka ya beno. Beno sala keba na yina beno ke na kukitala ntangu yayi. “Tala munu, Mfumu. Meka munu. Ya kele na yimbi na kati ya munu? Kana ya kele, Mfumu, ti mu bika yawu, kaka awa ntangu yayi. Kisika yayi, kisika mu me yinama, ya kele autel ya Nge. Mu me bika yawu, kaka awa ntangu yayi, na yisi ya makulu ya munu. Ntangu mu ke kwenda, ya ke vwanda kuna. Ngolo ya Menga ya Nge ke yoka yawu. Mu zola kuvwanda munungi. Mu kele na kima ke na kukwamisa munu, Mfumu. Mu zola kununga, na suka yayi. Mu lenda, na nzila ya Nge. Ba me tubila munu yawu, na nzila ya Ndinga ya Nge. Mu me bika yawu awa, Mfumu, mpe mu me tula yawu na yisi ya makulu ya munu. Na yina mu ke basika na kivinga yayi na suka yayi, mu ke kwenda, na kuzabaka ti ya kele ya kutula na kati ya javel ya Nzambi. Ba ke bambuka dyaka moyo na yawu ve. Mu ke tuba yawu ntangu yayi mpe ke lomba kyadi.”

¹⁸⁷ Na bayintu ya beto ya kukulumusa, na meso ya beto ya kukangama; na bantima ya beto ke banza, yina kele kyelo ya moyo, beno zaba. Ya kele na kima yina beno zola kubika na suka yayi, kima yina beno zola kununga? Mpe beno me mekaka yawu bambala mingi, kasi, na suka yayi, beno ke bika kaka kumeka. Beno ke ndima kaka yina Yandi salaka. Mu zola kaka beno kutelemisa diboko ya beno, kutuba, “Mfumu, mu zola kununga. Kima mosi ke kwamisa munu.”

¹⁸⁸ Mfumu Yesu, Nge ke mona maboko yina. Ntangu yayi, mutindu kisadi ya Nge, mu ke telema na kati-kati ya bantu ya moyo mpe bantu ya kufwa, mu ke bedisa kima nyonso yina ke na

kukwamisa bantu yayi mpe munu mosi. Mpe mu ke lomba yawu na Nkumbu ya Yesu Klisto, beto lenda bika yawu awa na autel ya Nzambi, mpe kukwenda na suka yayi, na kimpwanza, mutindu minungi.

¹⁸⁹ Kana bampangi ya beto ya bakento kuzwaka ve ntete lemvo, ti ba kuzwa yawu ntangu yayi, Mfumu. Kana bampangi ya beto ya babakala kuzwaka ve lemvo, ti ya pesama ntangu yayi. Mpe ti, mama na bana ya yandi, na kisika ya kuvwanda na lunangu, kukikulumusa. Mama zaba ti yandi kele. . . Yandi kele mulongi ya mwa bana yina. Luzingu ya yandi kele kifwanusu. Papa kele kifwanusu ya mama, samu ti yandi kele yintu ya yinzo. Mama vwanda me meka na kutwadisa yandi; yandi ke sala dyaka yawu ve. Kana bakala vwanda sadilaka yandi mutindu nkwalala, yandi ke sala dyaka yawu ve. Yandi kele kisadisi. Pesa yawu, Mfumu. Bika ti bima yayi nyonso yina ke kangaka beto nzila, Mfumu, kukatukila beto.

¹⁹⁰ Beto—beto ke kukipesa beto mosi, Tata, samu na ntangu yina me bikana na beto na kuzinga, na kuzabaka yayi, ti beto fwana kuma na nsuka ya yawu, mpe yina ntama mingi ve. Na yawu, na suka yayi, beto ke baka ntangu yayi mutindu bweso, na manima ya Nsangu yayi. Beto ke baka ntangu yayi, Mfumu, na kukwiza, samu ti ba me bokila beto na kukwiza. “Beni bika bampasi ya beni na zulu ya Yandi, samu ti Yandi ke kebaka na beni.” Mu zaba ti Nge ke kebaka, Mfumu. Nge kebaka mingi na beto na kufwaka samu na beto. Mpe ya kieleka beto lenda kipe mingi kukwiza mpe kundima na yina Nge kufwaka.

¹⁹¹ Santisa beto, Mfumu. Fulusa beto dyaka na Mpeve-Santu. Ti Mpeve-Santu kuyala kaka na kati ya bantima ya beto, na mutindu ya zulu mingi, ti beto ke tambula, na kuzimbanaka bima yina lutaka, mvindu mpe poto-poto na yina beto vwandaka zinga na ntangu mosi. Beto ke kima mbangu na mantwala samu na kuzwa musembo yina ba ke na kubokila beto na mazulu, kisika Bansemo ya beto lenda lezima mingi na mbote mpe kukikulumusa, tii kuna muntu nyonso ke luta lenda tuba, “Ya kele Muklisto ke zingaka kuna na mongo yina. Muntu yina, kento yina, bakala yina, kele fololo ya kieleka ya busantu ya Nzambi. Bawu kele mbote mingi mpe ya lembami mingi, ntangu nyonso ya kufulukana na luzolo mpe mbote, mpe ke kuwa.” Pesa yawu, Tata. Ti beto vwanda mungwa, yina ntoto lendaka vwanda na mpwila; pesa yawu, Tata; mpe nunga bima ya yinza yayi, mpe bampasi ya luzingu yayi. Na Nkumbu ya Yesu Klisto. Amen.

Mu lenda . . .

Ntangu yayi beto telemisa kaka diboko ya beto.

. . . Mvulusi . . .

Yinki kele mbokolo? “Mata, basika na poto-poto.” Luzingu ya kulutula zulu; Kima kele na kati ya beni, ke na kubenda beni lweka yina. Yinki ya kele? Ya kele Yandi. Kuna na kati ya

poto-poto, mwa bafololo; beno kele na Luzingu na kati kuna, yina ke pusa beno. Yawu yina ke bokila beno, “Mata, basika na poto-poto.”

“ . . . landa, landa . . . ”

¹⁹² Ntangu yayi, beno zola kutuba yawu? Ntangu yayi beno kanga meso ya beno.

Mu ke landa kisika Yandi ke twadisa munu,

Ntangu yayi beno bika beno mosi. Beno zola kutuba yawu, ntangu yayi.

Mu ke landa kisika Yandi ke twadisa munu,

Mu ke landa kisika Yandi ke twadisa munu,

Mu ke kwenda na Yandi, na Yandi, tii na nsuka.

Kisika Yandi ke twadisa munu mu . . .

Kaka na lembami ntangu yayi. Beno bambuka moyo, beno kukibika kuna.

. . . Yandi ke twadisa . . .

“Mu ke bika yawu awa, Mfumu. Mu ke landa Nge, kubanda ntangu yayi. Mu me ndima Yawu. Mu me kwikila Yawu.”

Kisika Yandi ke twadisa . . .

Beno bambuka moyo, luzingu ya beno ke pesa kimbangi ngolo mingi kulutila yinwa ya beno. Yina beno ke zinga ke lakisa na bantu kulutila yina beno ke tuba.

Kukwenda na Yandi, na Yandi, (Tii . . . Wapi kisika?) nzila nyonso.

¹⁹³ Beno kukipesa kaka beno mosi, na mudindu, na kieleka nyonso, ntima ya beno nyonso. Wapi mutindu kana yayi vwanaka mbala ya nsuka beno ke vwanda na muswa ya kusambila? Ya lendaka vwanda. Mu banza ve. Ya lendaka vwanda. Na yina, beno vwanda kieleka ntangu yayi, kieleka ya kieleka, kieleka ya kieleka. Beno bambuka moyo, mwelo ke kangama, kilumbu mosi, na manima yimeni. “Beno lomba, beno ke kuzwa.”

¹⁹⁴ Beno banza kaka na nkembo nyonso yina Yandi me pesa beno, na nyonso yina Yandi me sala. “Mu ke kwikila, Mfumu. Mu ke kwikila. Mu ke kwikila ti Nge kele munungi ya munu. Mu ke tambula kaka na Nge, Mfumu. Mu zola kuvwanda pene-pene ya Nge, ti kisika Nge kele, kuna mu zola kuvwanda.”

¹⁹⁵ Mpe bambuka moyo, Nge tubaka na beto, Tata, ti, “Beto ke vwanda ntangu nyonso na Mfumu, ntangu beto ke bakama.” Beto ke kaka na dibanza ya Yandi ntangu yayi, mutindu Yandi ke tambula na beto ntangu yayi. Kasi kuna beto ke . . . Wapi kima ya nene ya kele, kaka na kuzaba ti Yandi kele na kati-kati ya beto—ya beto! Yinki ya ke vwanda ntangu beto ke vwanda na Yandi ntangu nyonso? Beto ke zolaka mingi bansalulu ya beto: beto lenda kwenda kunata mpunda; beto lenda kwenda sumba bima;

betu lenda kwenda kuzomba, kuloba, to nyonso yina lenda pesa betu byese. Kasi, oh, ntangu dibuundu ke zibukaka, betu zola kukutana na Mfumu ya betu. Yina kele ya kulutila nene na bima nyonso. Na yina, beno banza, Yandi silaka betu. “Mpe ntangu nyonso ke vwanda na Mfumu. Kuvwanda na Yandi na kiti ya Yandi ya kimfumu, mpe kuvwanda na Yandi ntangu nyonso.” O Nzambi, na—na bayintu ya kukulumusa, betu ke kukikumusa, betu ke ndima yawu, Mfumu, na Nkumbu ya Yesu Klisto.

¹⁹⁶ Beno ke kukitala ti beno lenda bika kaka, ntangu yayi, nyonso, kizitu nyonso? Beno lenda tambula kaka, na zulu ya yawu ntangu yayi? Kana beno lenda, beno telemisa diboko ya beno, beno tuba, “Na lemvo ya Nzambi mu ke bika kumekama yayi. Mu ke nwana na yawu, dyaka ve. Mu ke simba kaka diboko ya Yandi, mpe kubanda na kutambula.”

“Mu me nwana, Mpangi Branham. Mu mekaka na kubika kunwa tabaka. Mu—mu mekaka na kubika nsuki ya munu kukula. Mu mekaka na kusala *yayi*. Mu salaka . . . Mu mekaka, na ngolo mingi, Mpangi Branham. Mu lenda kaka ve kusala yawu.”

Kumeka dyaka, yawu ve. Simba kaka diboko ya Yandi, tuba, “Tata, Kotisa diboko ya munu na diboko ya kazaka.” Beno me mona? “Mu ke pesa Nge kaka diboko ya munu. Mu ke kwenda na ntwala, Mfumu, na kutalaka na Nge.” Ya ke salama. Yandi ke lwatisa beno mutindu Muklisto ya kieleka. Beno ke vwanda Muklisto ya kieleka.

¹⁹⁷ Tii mu ke mona beno, na nkokila yayi, ti Nzambi zola beno mpe kuvwanda na beno. Beno kele bana ya munu na Nsangu ya mbote. Beno kele bayina ba futaka.

Ntangu yayi mu ke pesa pasteur ya beno, na beno, samu na kukanga, Mpangi Neville . . . ? . . .



WAPI MUTINDU MU LENDA KUNUNGA? KNG63-0825M
(How Can I Overcome?)

Nsangu yayi ya Mpangi William Marrion Branham, kulongamaka na Kingelesi, na Lumingu na suka, na kilumbu ya 25 ya Ngonda ya nana, na mvula 1963, na Branham Tabernacle na Jeffersonville, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2022 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org